

Bosna i Hercegovina
Federacija Bosne i Hercegovine
**SKUPŠTINA KANTONA
SARAJEVO**



Босна и Херцеговина
Федерација Босне и Херцеговине
**СКУПШТИНА КАНТОНА
САРАЈЕВО**

Bosnia and Herzegovina
Federation of Bosnia and Herzegovina

**CANTON SARAJEVO
ASSEMBLY**

Nezavisni odbor
Broj:01-04-556-37/21
Sarajevo, 23.03.2021. godine

SKUPŠTINA KANTONA SARAJEVO

O V D J E

PREDMET: Izvještaj o radu Nezavisnog odbora za period septembar 2020. godine-februar 2021. godine - dostavlja se

Nezavisni odbor na sjednici održanoj dana 23.03.2021. godine razmatrao je Izvještaj o radu Nezavisnog odbora za period septembar 2020. godine-februar 2021. godine, a u skladu s članom 34. st.4. Zakona o unutrašnjim poslovima Kantona Sarajevo ("Službene novine Kantona Sarajevo" br.:1/16, 26/19,31/19 i 39/20), isti dostavlja Skupštini Kantona Sarajevo, na razmatranje.

PREDSJEDNIK

Miroslav Kružik, s.r.



web: <http://skupstina.ks.gov.ba>
e-mail: skupstina@skupstina.ks.gov.ba
Tel: + 387 (0) 33 562-044,
Fax:+ 387 (0) 33 562-210
Sarajevo, Reisa Džemaludina Čauševića 1





IZVJEŠTAJ
o radu Nezavisnog odbora za period septembar 2020. godine – februar 2021. godine

Sarajevo, mart 2021. godine



web: <http://skupstina.ks.gov.ba>
e-mail: skupstina@skupstina.ks.gov.ba
Tel: + 387 (0) 33 562-044, Fax: + 387 (0) 33 562-210
Sarajevo, Reisa Džemaludina Čauševića 1



Na osnovu člana 33. stav (1) tačka h) i člana 34. stav (4) Zakona o unutrašnjim poslovima Kantona Sarajevo („Službene novine Kantona Sarajevo“ br. 1/16, 26/19, 31/19 i 39/20) i članom 8. tačka 8) Poslovnika o radu Nezavisnog odbora ("Službene novine Kantona Sarajevo", br. 23/16, 39/19 i 48/20), Nezavisni odbor Skupštini Kantona Sarajevo, podnosi

IZVJEŠTAJ

o radu Nezavisnog odbora za period septembar 2020. godine – februar 2021. godine

I - Uvod

Nezavisni odbor imenovan je Odlukom o imenovanju Nezavisnog odbora Skupštine Kantona Sarajevo broj: 01-05-2513/18 od 31.01.2018. godine (u daljem tekstu Nezavisni odbor), a isti je u novom sazivu počeo sa radom 23.02.2018. godine. Odlukom o izmjeni Odluke o o imenovanju Nezavisnog odbora Skupštine Kantona Sarajevo („Službene novine Kantona Sarajevo“, broj: 27/19) od 24.06.2019. godine imenovan je novi član Nezavisnog odbora, te je u periodu od septembra 2020. godine - februara 2021. godine Nezavisni odbor obavljao poslove i zadatke u punom sazivu.

U Nezavisni odbor imenovano je sedam članova predstavnika iz reda građana.

Mandat članova Nezavisnog odbora traje 4 (četiri) godine.

Nezavisni odbor je u periodu septembar 2020. godine - februar 2021. godine obavljao poslove u skladu sa Zakonom o unutrašnjim poslovima Kantona Sarajevo, Zakonom o policijskim službenicima, Poslovníkom o radu Nezavisnog odbora, kao i drugim relevantnim zakonima i podzakonskim aktima.

U nadležnosti Nezavisnog odbora je da:

- (1) raspisuje i provodi Javni konkurs za imenovanje policijskog komesara;
- (2) vrši selekciju i predlaže listu kandidata za izbor policijskog komesara Vladi Kantona koju dostavlja posredstvom ministra;
- (3) prati rad policijskog komesara, nadzire primjenu ovlaštenja policijskog komesara u rukovođenju Upravom policije iz člana 23. Zakona o unutrašnjim poslovima i o tome izvještava Skupštinu Kantona Sarajevo;
- (4) ako procijeni za potrebnim može izvršiti neposredni uvid u akte i predmete Uprave policije u skladu sa članom 47. navedenog Zakona;
- (5) predlaže smjenu policijskog komesara Vladi Kantona u skladu sa Zakonom o unutrašnjim poslovima;
- (6) vodi prvostepeni disciplinski postupak protiv policijskog komesara i izriče disciplinske sankcije;
- (7) prima, razmatra i postupa po podnesenim žalbama na rad policijskog komesara;
- (8) usvaja Poslovnik o radu Nezavisnog odbora;
- (9) sačinjava izvještaje o radu Nezavisnog odbora svakih šest mjeseci i dostavlja ih Skupštini Kantona na razmatranje;
- (10) sačinjava detaljan tromjesečni izvještaj o radu policijskog komesara, koji dostavlja Skupštini Kantona;
- (11) po potrebi razmjenjuje informacije, podatke, dokumente po pojedinim predmetima sa Komisijom za sigurnost Skupštine Kantona Sarajevo;
- (12) obavlja druge poslove propisane Zakonom o unutrašnjim poslovima Kantona Sarajevo, Zakonom o policijskim službenicima Kantona Sarajevo i drugim propisima.

II – Normativni dio

Tokom izvještajnog perioda Nezavisni odbor je:

- podnio Izvještaj o radu Nezavisnog odbora za period mart 2020. godine - august 2020. godine, koji je usvojen 17.11.2020. godine na 30. sjednici Skupštine Kantona Sarajevo;
- sačinio detaljne tromjesečne izvještaje o radu policijskog komesara za period : april-juni, juli – septembar 2020. i oktobar-decembar 2020. godine i uputio ih Skupštini Kantona Sarajevo.

S obzirom da su detaljni tromjesečni izvještaji o radu policijskog komesara materijali informativnog karaktera isti nisu razmatrani na sjednici Skupštine Kantona Sarajevo.

U vršenju zadataka iz svoje nadležnosti Nezavisni odbor je donosio zaključke, sačinjavao odgovore, informacije, kao i druge akte iz svoje nadležnosti, te redovno obavještavao javnost o svom radu.

U izvještajnom periodu Nezavisni odbor je prosljedio na eventualno daljnje postupanje Presudu Općinskog suda u Sarajevu broj: 65 0 Rs 361381 19 Rsž 5 od 02.11.2020.godine Kantonalnom tužilaštvu Kantona Sarajevo, kao i zaprimljenu anonimnu prijavu koja se odnosi na način sticanja činova policijskog komesara Nusreta Selimovića.

III - Tematski dio

Tokom izvještajnog perioda Nezavisni odbor je održao 6 redovnih sjednica.

Na tridesetprvoj sjednici održanoj 22.09.2020. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec august 2020. godine.

Na navedenoj sjednici Nezavisni odbor je pripremio Izvještaj o radu Nezavisnog odbora za period mart 2020.god.-august 2020. godine i isti je prosljedio na razmatranje Skupštini Kantona Sarajevo. Izvještaj o radu Nezavisnog odbora usvojen je od strane Skupštine Kantona Sarajevo.

Na sjednici je izvršen reizbor predsjednika Nezavisnog odbora i njegovog zamjenika koji će obavljati ove funkcije u periodu od narednih šest mjeseci, a što je predviđeno odredbama člana 9. Poslovnika o radu Nezavisnog odbora.

Na sjednici je policijski komesar Uprave policije MUP-a Kantona Sarajevo ukratko obrazložio stanje sigurnosti u Kantonu Sarajevo za mjesec avgust 2020. godine. On je iznio da je u odnosu na mjesec august 2019.godine povećan broj registrovanih događaja sa obilježjem krivičnih djela, a isti je istakao da je povećanje navedenih djela rezultat provedene akcije kodnog naziva „DAR 1“ koju je pod nadzorom Kantonalnog tužilaštva Kantona Sarajevo provela Uprava policije MUP-a Kantona Sarajevo s ciljem rasvjetljavanja i dokumentovanja krivičnih djela sa obilježjem korupcije u redovima policije. Podneseni su službeni izvještaji protiv 18 policijskih službenika zbog postojanja osnova sumnje da su počinili ukupno 151 krivično djelo. U augustu 2020. godine otuđeno je devet motornih vozila od kojih je pet vraćeno vlasnicima. Policijski komesar je istakao da i dalje veliki problem predstavljaju migranti te da se računa da je na području Kantona Sarajevo stacionirano blizu 3000 migranata, od toga njih oko 1400 je smješteno u Ušivku. Iznio je da je zabrinjavajuće što novi migranti pristižu i da je evidentno da novi val počinje uzimati danak. Rekao je da je veoma teško nositi se sa ovim problemom sa kantonalnog nivoa, te da je Uprava policije predlagala određena rješenja putem pisanih akata i usmeno na online sastancima čiji su predstavnici bili učesnici da se na neki način animira državni nivo u cilju da se migranti izmjestu van gradskih područja. Više puta je predlagano da se izbjeglički kamp u Blažuju hermetički zatvori kako bi se spriječilo slobodno kretanje istih, da se cijeli kamp pokrije video nadzorom i fizičkim nadzorom, međutim nije bilo odgovora od IOM-a. Primjetno je da su migranti sve agresivniji, povećava se broj učinjenih prekršaja i krivičnih djela čiji su oni izvršioци, prodaju maramice na ulicama, prose što predstavlja jedan veoma ozbiljan i kompleksan problem. Održavaju se određeni online sastanci ali

nikakvih konkretnih aktivnosti nema. Policijski komesar je istakao i problem internog premještaja jer ljudi neće da se zamjeraju jedni drugima.

Član Nezavisnog odbora je čestitao komesaru na akciji vezano za borbu protiv korupcije u vlastitim redovima, posebno sa aspekta činjenice da je ove aktivnosti policijski komesar naveo u svom planu rada kada je aplicirao na ovu poziciju. Postavio je pitanje policijskom komesaru u vezi Pravilnika o poklonima koje je donio bivši komesar Mevludin Halilović za koje nije imao pravni osnov odnosno koje je donio nezakonito a o kojima je bilo riječi na prethodnim sjednicama.

Policijski komesar je odgovorio da je predmet proslijeđen unutrašnjoj kontroli na postupanje i da je traženo mišljenje Sektora za finansijsko materijalnu kontrolu. Čekalo se na odgovor Ministarstva pravde i Ministarstva finansija Kantona Sarajevo u smislu da li su navedene institucije u postupku donošenja Pravilnika dale mišljenje. Njihov odgovor je bio negativan, dakle navedena ministarstva nisu dala mišljenje na tekst tih Pravilnika. Pokrenut je disciplinski postupak protiv bivšeg komesara i prvostepeni postupak je okončan na način da nije utvrđena povreda službene dužnosti. Na ovakvu odluku disciplinske komisije uložena je žalba. Uporedo sa disciplinskim postupkom upoznat je tužilac sa ovim predmetom.

Članica Nezavisnog odbora, istakla je da je nevjerojatno da se u Upravi policije ne primjenjuje Odluka o kancelarijskom poslovanju na način da se svi akti koji se odnose na konkretan predmet ne drže na jednom mjestu. Posebno zabrinjavajuće je to što se ne radi o predmetima prije 10 ili 20 godina koji bi eventualno trebali predstavljati arhivsku građu ili ići na uništenje ako je protekao rok koji je određen za čuvanje tih predmeta. U pitanju su Pravilnici koji su doneseni prije par godina i službenici koji su vodili taj predmet bi u spisu istog trebali imati sva mišljenja nadležnih institucija i akte koji su nastali u radu na tim Pravilnicima. Kako se ne može saznati ko je službenik/službenici koji su radili na predmetu i bili zaduženi za isti. S druge strane, vezano za disciplinski postupak istakla je nelogičnost obzirom da se sjeća da se Nezavisnom odboru, pisanim putem ranije obratio policijski službenik MM koji je istakao da je protiv njega pokrenut disciplinski postupak i da je kažnjen za povredu službene dužnosti jer je neki tekst bio objavljen na njegovom fb profilu od strane njegove kćerke. Kako je moguće da je neko za pisanje po fb profilu kažnjen i utvrđena mu je disciplinska odgovornost, a policijski službenik koji se potpisao kao glavni inspektor, dakle ne svojim vlastitim imenom i prezimenom i pismenim putem se obratio Skupštini Kantona Sarajevo, za njega diciplinska komisija utvrdi da nije bilo povrede službene dužnosti.

Policijski komesar je odgovorio da je to normalna pojava u Upravi policije i da je ustaljena praksa da predmeti nisu na jednom mjestu, da se ne može doći do Pravilnika ili da su na snazi a da se uopće ne zna za njih. Istakao je da je donesen novi Pravilnik o posebnoj uniformi i dijelovima uniformi a da je stari stavljen van snage.

Policijski komesar je upoznao Nezavisni odbor da je održan sastanak (koordinacija) direktora Federalne uprave policije sa komesarima iz FBiH na kojem su prošle dvije inicijative koje je on predložio, i to: 1) priprema i izrada nove uredbe o jedinstvenoj policijskoj uniformi s tim da MUP FBiH bude nosilac nabavke jedinstvene uniforme za Federaciju BiH i 2) iniciranje izmjene zakona o državnim službenicima i namještenicima u državnoj službi kako bi se rješio problem većeg broja invalida rada II kategorije koji opterećuje skoro svaki kantonalni MUP. Vezano za nabavku uniformu dodao je da će se pokušati ići na nabavku sa federalnog nivoa posebno za kantone koji nemaju dovoljno novca za nabavku istih kako bi se na kraju postigla jednoobraznost u uniformiranosti.

Član Nezavisnog odbora se nadovezao na pitanje članice Nezavisnog odbora da se utvrdi ko je pripremio sporne pravilnike jer iste sigurno nije sačinio bivši komesar Halilović u smislu da je iste neko morao parafirati prije nego što su došle na potpis tadašnjem policijskom komesaru. Postavio je pitanje policijskom komesaru da li ima te podatke.

Također, osvrnuo se i na natpise u pojedinim medijima o mogućim krađama glasova na predstojećim izborima kao i to da li policija ima pripremljene planove za sprečavanje mogućih nepravilnosti odnosno izbornih krađa na narednim izborima u smislu obezbjeđenja a ne javnog reda i mira, ima li Uprava policije ingerencije u tom smislu i u kojem pravcu se razmišlja.

Policijski komesar je odgovorio da ne postoje pisani tragovi o autoru ovih spornih pravilnika. Također je istakao da s obzirom na ambijent i ukupnu atmosferu u cijelom društvu, svakako da Uprava policije planira određene poteze koji će odstupiti od uobičajenih. Aktivirat će se sve službe, svi resursi i postoje određena biračka mjesta koja će biti „posebno tretirana“. Postupak će se planski i vrlo ozbiljno.

Članica Nezavisnog odbora je postavila pitanje da li policijski komesar imenuje disciplinsku komisiju te da li ista ima određenu odgovornost za svoj rad.

Policijski komesar je odgovorio da on imenuje disciplinsku komisiju ali da nema mogućnost prevelikog izbora obzirom da je jako mali broj stručnih pravnika u Upravi policije.

Član Nezavisnog odbora osvrnuo se na stalne paljevine m/v te postavio pitanje policijskom komesaru da li se preduzimaju određene radnje u cilju sprečavanja ovih djela odnosno da li ima nekog pomaka u otkrivanju izvršioaca ovih krivičnih djela.

Policijski komesar je istakao da je paljevina veoma teška za dokazivanje. Većina oštećenih nisu za saradnju sa policijom. Tu se uglavnom radi o neraščišćenim odnosima između pojedinaca, tako da su veoma slabi rezultati u rješavanju ovih slučajeva. Smatra da paljevine imaju veze sa organizovanim kriminalom. Te informacije Uprava policije dijeli sa agencijama koje su stvarno nadležne za tu oblast. Jako je teško pronaći počinioca tih krivičnih djela jer se često radi o reketu, ljubavnim svađama tako da je to veoma teško i prevenirati i rasvijetliti.

Članica Nezavisnog odbora postavila je pitanje policijskom komesaru vezano za jednu od prethodnih sjednica kada je policijski komesar upoznao Nezavisni odbor da su neki od visokopozicioniranih policijskih službenika odbili izvršiti njegovu zakonito izdatu naredbu, da li je pokrenut disciplinski postupak protiv tih službenika.

Policijski komesar je odgovorio da nije pokrenut disciplinski postupak zbog izmjena i dopuna Zakona o policijskim službenicima i Zakona o unutrašnjim poslovima jer je zbog njih izgubljeno mnogo vremena i očekivao je da se izmjenama ovih zakona otvori mogućnost za donošenje Uredbe o dodjeli i oduzimanju činova tako da je mislio da će sa što manje uloženog napora dobiti što je moguće više. Pretpostavljao je koliko dugo bi trajala unutrašnja istraga. Zastara u svakom slučaju još uvijek nije nastupila, jedan od policijskih službenika je veoma blizu odlaska u penziju a disciplinski postupak se ne može pokrenuti samo protiv jednog policijskog službenika a da drugi ne budu obuhvaćeni tim postupkom.

Član Nezavisnog odbora je istakao da Nezavisni odbor periodične izvještaje policijskog komesara o njegovom radu detaljno čita te da neki pasusi uopće nemaju veze sa radom komesara i isto treba biti izbrisano iz izvještaja (naveo je primjere o posjećenosti web stranice, nabavci repromaterijala, itd). Predložio je da budući izvještaji sadrže samo informacije o radu policijskog komesara, što je komesar i prihvatio kao sugestiju.

Članica Nezavisnog odbora, je zatražila od policijskog komesara da za sljedeću sjednicu pripremi informaciju o broju policijskih službenika koji u ovoj godini ispunjavaju uslove za penziju, ne imena i prezimena već samo broj i činovi.

Policijski komesar je istakao da bi u naredne dvije godine 100-tinjak policijskih službenika trebalo ispuniti uslove za odlazak u penziju. Iznio je da nije tačna informacija da ove godine (2020. god.) u penziju odlazi 100 policijskih službenika. Upravi policije nedostaje 350 ljudi, 20 ljudi su invalidi II kategorije a vode se kao policijski službenici ali faktički ih nemate na terenu. Otprilike oko 450 ljudi trenutno fali a sigurnosni izazovi su puno drugačiji sada nego prije tri godine, u smislu migranata, pandemije COVID-19 i sl.

Član Nezavisnog odbora postavio je pitanje policijskom komesaru vezao za trenutno stanje kadrova u Upravi policije.

Policijski komesar je odgovorio da je situacija puno bolja. Trenutno se skeniraju personalni dokumenti odnosno personalni dosjei zaposlenih u Upravi policije. Potpisan je nalog da se ide sa postupkom javne nabavke, imat će evidencije PIO, školska sprema i svi dokumenti će se skenirati.

Član Nezavisnog odbora postavio je pitanje policijskom komesaru da li će se moći raditi revizija.

Policijski komesar je odgovorio da će sve odmah ići na provjeru OSA-i u smislu dodatne sigurnosne provjere. Komisija donosi odluku o prekobrojnosti dostavlja je policijskom komesaru i komesar prekida radni odnos. Policijskog komesara na to obavezuje Zakon o zaštiti tajnih podataka.

Policijski komesar je istakao da bi na narednoj sjednici Skupštine Kantona Sarajevo trebali biti razmatrani Zakon o izmjenama Zakona o unutrašnjim poslovima i Zakon o izmjenama i dopunama Zakona o policijskim službencima. Nakon stupanja na snagu navedenih zakona krenut će se sa aktivnostima na izradi podzakonskih akata koji su nužni za činovanje i prijem policijskih službenika. Paralelno bi se trebalo raditi na novom zakonu o unutrašnjim poslovima za koji je inicijativu podnio zastupnik Aljoša Čampara.

Na tridesetdruoj sjednici, održanoj 20.10.2020. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec septembar 2020. godine. Na sjednici je policijski komesar Uprave policije MUP-a Kantona Sarajevo ukratko obrazložio stanje sigurnosti u Kantonu Sarajevo za mjesec septembar 2020. godine. On je istakao da su u mjesecu septembru evidentirana 234 događaja sa obilježjem krivičnog djela protiv imovine što je za 61 više u odnosu na isti mjesec prošle godine. Iz ove oblasti najbrojniji događaji sa obilježjem krivičnog djela su: teška krađa, krađa, razbojništvo, itd. Nadležnom tužilaštvu podneseni su službeni izvještaji protiv 51-og lica, od kojih je 40 povratnika, a 22 su lišena slobode. Od ukupno 206 događaja evidentiranih po nepoznatom izvršiocu iz oblasti protiv imovine naknadno su rasvijetljena 44 što je za 10,1% manje u odnosu na septembar 2019. godine.

Tokom mjeseca septembra ove godine 57 teških krađa izvršeno je u stambene objekte, 40 u poslovne prostore i 16 u motorna vozila

U toku mjeseca septembra 2020. godine na području Kantona Sarajevo evidentirana su dva događaja aktiviranja minsko-eksplozivnih naprava usljed čega je nastupila materijalna šteta. Tokom mjeseca septembra 2020. godine, na području Kantona Sarajevo registrovano je 17 požara u kojima su dva lica lakše povrijeđena. Policijski komesar je iznio podatke da su u mjesecu septembru 2020. godine, registrovana četiri pojedinačna napada na policijske službenike Uprave policije MUP-a KS. U napadima su učestvovala tri punoljetna lica koja su koristila fizičku snagu i jedno neidentifikovano lice koje je putničkim motornim vozilom pokušalo udariti policijskog službenika. Policijski službenici Uprave policije su u mjesecu septembru 2020. godine u sedam slučajeva upotrijebili silu.

Na osnovu Izvještaja Operativnog tima za pitanja migranata, a prema podacima IOM-a na području Kantona Sarajevo, u mjesecu septembru 2020. godine, u prihvatnim, azilantskim i imigracionim centrima boravilo je cca 3.095 migranata. Policijski službenici Uprave policije MUP-a Kantona Sarajevo su u mjesecu septembru 2020. godine proveli ukupno 12 akcija, kontrolisali 1.671 migranta, od čega 95 nije posjedovalo registracijski obrazac, 40 je upućeno, a 15 predato Službi za poslove sa strancima radi registracije i 81 migranat je smješten u prihvatne centre na području Kantona Sarajevo.

Na kraju svog izlaganja policijski komesar je informirao Nezavisni odbor o sankciji koju je Policijski odbor na osnovu žalbe disciplinskog tužioca izrekao bivšem policijskom komesaru Mevludinu Haliloviću, u vidu smanjenja 15% od plaće u naredna 3 mjeseca, zbog teže povrede službene dužnosti. Također je informisao Nezavisni odbor da je u toku priprema elaborata o opravdanosti kupovine kamera visoke rezolucije (body kamera) za policijske službenike Jedinice za saobraćaj i specijalne jedinice. Za ove nabavke planirat će se dodatna sredstva putem Ministarstva unutrašnjih poslova Kantona Sarajevo. Intencija je da se kamere instaliraju na određena mjesta na službenim uniformama, obuče ljudi za njihovo korištenje jer se smatra da bi se time smanjila mogućnost za korupciju u vlastitim redovima.

Članica Nezavisnog odbora, postavila je pitanje policijskom komesaru da li je u vezi sa naprijed navedenim konsultovana Agencija za zaštitu ličnih podataka kako se ne bi doveli u situaciju da se kamere nabave a da mišljenje navedene Agencije bude negativno.

Policijski komesar je odgovorio da ovaj postupak ide postepeno kako se ne bi doveli u neke nepredviđene situacije. U toku je izrada podzakonskih akata i obratit će se za mišljenje Agenciji za zaštitu ličnih podataka, ali smatra da će mišljenje navedene Agencije biti pozitivno jer se gore pomenute kamere koriste u većini evropskih zemalja.

Ona je također postavila pitanje policijskom komesaru da li će se ove kamere koristiti samo u saobraćaju ili će svi policijski službenici njima biti ozvučeni na neki način.

Policijski komesar je odgovorio da se to neće desiti samo u saobraćajnoj jedinici već će svi policijski službenici imati kameru na ramenu i snimat će se njihove aktivnosti (radnje) non-stop. Samo dvije osobe će imati pristup serveru i ti podaci će se moći dobiti samo na zahtjev suda odnosno na osnovu naloga tužilaštva pregledat će se kamere. Praksa je pokazala da je uvođenje ovih kamera dobra preventiva za koruptivne radnje. Projekcija je da će nabavka ovih kamera koštati oko 1.000.000. KM.

Nezavisni odbora je obavijestio policijskog komesara da je zaprimio zahtjev advokata Alena Nakića vezano za njegov odgovor na postavljeno pitanje na sjednici Nezavisnog odbora od 18.03.2020. godine a isto se odnosilo na bivše policijske službenika koji nisu prošli sigurnosne provjere. Istakao je da sekretar Nezavisnog odbora vodi zapisnik sa sjednica Nezavisnog odbora kao i članica Nezavisnog odbora koja dodatno vodi zabilješke te da nije jasno kako je moguće da je policijski komesar u svom odgovoru gore navedenom advokatu naveo da on na sjednici Nezavisnog odbora nije spominjao nikakva imena.

Policijski komesar je odgovorio da mu je frapantno šta je to advokat naveo u svom zahtjevu jer on nikada nije spominjao nikakva imena. Istakao je da je on na sjednici Nezavisnog odbora rekao da ga je zvao direktor (OSA-e) i da ga je isti pitao da li postoji mogućnost da su se možda neke okolnosti promijenile. On (direktor OSA-e) u tom razgovoru jeste spomenuo imena ali on (policijski komesar) na sjednici Nezavisnog odbora nije spomenuo imena. Također je dodao da je rekao da ih samo sud može vratiti na njihova radna mjesta. Naglasio je da traži da mu se ubuduće taj dio zapisnika sa sjednica Nezavisnog odbora, koji se odnosi na njegovo izlaganje, dostavi. Jer tek tada, kada pročita to i složi se sa napisanim može stati iza toga.

Član Nezavisnog odbora objasnio je policijskom komesaru da dostavljanje zapisnika ili njegovih dijelova (izvoda) nije definisano Poslovníkom o radu Nezavisnog odbora, ali isti može podnijeti zahtjev Nezavisnom odboru da mu se dostave izvodi iz zapisnika što će Nezavisni odbor razmotriti na svojoj sjednici.

Članica Nezavisnog odbora se nadovezala na izlaganje policijskog komesara vezano za zahtjev advokata Nakića u vezi sa izlaganjem policijskog komesara na sjednici od 18.03.2020. godine. Naglasila je kako je Nezavisnom odboru bilo frapantno i u najmanju ruku iznenađujuće kada su pročitali da je policijski komesar u svom odgovoru advokatu naveo da njegovo izlaganje izneseno u Zapisniku Nezavisnog odbora od 18.03.2020. godine nije tačno a time se daje osnova da advokat u svom zahtjevu navede da je Nezavisni odbor (ako je istina to što je policijski komesar rekao) počinio krivično djelo krivotvorenja isprave. U tom smislu pitala je policijskog komesara da li ga je telefonski kontaktirao direktor OSA-e, da li ga je isti pitao da li su promjenjene okolnosti vezano za policijske službenike koji su ostali bez posla jer nisu prošli sigurnosne provjere, da li su spominjana imena u tom razgovoru i šta bi promijenilo stvar da eto kojim slučajem on nije spominjao imena na sjednici Nezavisnog odbora od 18.03.2020. godine, odnosno da je spomenuo imena koja bi bila posljedica. Također je dodala da ne samo Nezavisni odbor već pola Kantona Sarajevo zna da postoje policijski službenici koji nisu prošli sigurnosne provjere i da su ostali bez posla, dakle možda se ne znaju tačna imena i prezimena ali se zna da ti ljudi postoje te ne vidi posljedicu toga što je policijski komesar spomenuo imena na sjednici Nezavisnog odbora. Naglasila je da Nezavisni odbor stoji iza zapisnika od 18.03.2020. godine i da je isti jednoglasno usvojen.

Policijski komesar je odgovorio da po njegovom mišljenju razlog zašto je advokat podnio zahtjev jeste taj da se na neki način diskredituje OSA odnosno njen direktor, jer se na taj način pokušava probuditi sumnja u njen rad jer kroz primjer tih policijskih službenika se želi pokazati da na neki način u određenom trenutku postoje sigurnosne smetnje a u nekom drugom ne postoje, odnosno da se „poljulja“ kredibilitet te institucije.

Članica Nezavisnog odbora, osvrnula se na informaciju Pravobranilaštva Kantona Sarajevo kojom se traži dostava podataka u vezi sa izlaganjem bivšeg policijskog komesara Mevludina Halilovića na održanom ročištu u kojem je navedeno da je UP Kantona Sarajevo obezbjeđivala Novaka Đokovića prilikom njegovog boravka u Sarajevu, te u tom smislu postavila pitanje policijskom komesaru da li su policijski službenici MUP-a KS obezbjeđivali istog.

Policijski komesar je odgovorio da Novak Đoković ima vlastito osiguranje i da su ga osiguravala dva pukovnika MUP-a Srbije. Istakao je da je on javna ličnost i da je za njim bilo pojačano interesovanje. Ono što je Uprava policije radila jeste da je patrola obezbjeđivala hotel gdje je Novak boravio što bi ista svakako radila i da u tom hotelu nije boravio Đoković.

Dodao je da je Kantonalnom tužilaštvu Kantona Sarajevo dostavljen još jedan predmet vezano za kupovinu mobilnog aparata u vrijeme bivšeg policijskog komesara (Halilović) kojem se ne može ući u trag, odnosno isti fizički nije u Upravi policije a kupljen je novčanim sredstvima Uprave policije. Isto je podnesno Kantonalnom Tužilaštvu u formi izvještaja o poduzetim mjerama i radnjama.

Članica Nezavisnog odbora se osvrnula na dostavljene podatke Uprave policije u vezi sa penzionisanjem policijskih službenika u kojim je navedeno da Uprava policije nije u mogućnosti dostaviti podatke o broju policijskih službenika Uprave policije koji bi u periodu od 01.01.2021. godine do 31.12.2022. godine prestao radni odnos zbog navršenih 40 godina staža osiguranja. Nadalje to je obrazloženo činjenicom da Uprava policije prikuplja relevantne podatke i dokumentaciju koji se odnose na staž osiguranja i evidentira u elektronskoj bazi podataka kadrovskih evidencija. Ista je naglasila da je nemoguće povjerovati da Uprava policije već nema neku kadrovsku evidenciju te kako je moguće da uopće nemaju podatke o broju policijskih službenika koji ispunjavaju uslove za odlazak u penziju. U tom smislu je postavila pitanje policijskom komesaru, da li postoji mogućnost da u navedenom periodu za koji isti nemaju podatke (01.01.2021.-31.12.2022. godine) neki od policijskih službenika ispunjavaju uslove za odlazak u penziju i šta bi se desilo da isti trebaju otići u penziju ali i dalje rade u Upravi policije, dobivaju platu, plaćaju im se doprinosi itd. Ko bi onda snosio odgovornost u tom slučaju?

Policijski komesar je odgovorio da je bitan staž osiguranja a ne penzioni staž i da nema mogućnosti da neki od policijskih službenika u navedenom periodu ode u penziju. Pojasnio je da su se zakonske odredbe izmijenile na način da je do stupanja na snagu novih zakonskih odredbi u FBH se računao penzioni staž a u RS staž osiguranja te je u tom smislu u praksi dolazilo da situacija da policijski službenici nisu mogli otići u penziju jer im nije bio uplaćen staž.

Član Nezavisnog odbora se osvrnuo na predmet vezan za policijske službenike i koruptivne radnje počinjene od strane istih i koji se trenutno nalaze u pritvoru te postavio pitanje policijskom komesaru da li u tom lancu postoji neka bar moralna odgovornost viših policijskih službenika (komandira, zamjenika komandira, načelnika). Da li je moguće da isti ne budu odgovorni jer su propustili na neki način kontrolisati te ljude na terenu, posebno je naglasio njihovu profesionalnu odgovornost.

Policijski komesar je odgovorio da se ne slaže sa takvim razmišljanjem. Istakao je da svi već 20 godina znaju manje-više o nekim koruptivnim radnjama i da je policija po svim istraživanjima i analizama u vrhu korupcije po svim skalama. Do sada se nikada ništa nije uradilo po tom pitanju. Ne vidi šta su mogli uraditi neki komandiri, zamjenici komandira i dr. Bez posebnih istražnih radnji ništa se nije moglo uraditi. Svi oni imaju samo plan kontrolnih aktivnosti i to je to. Po njemu, svi na neki način u Upravi policije imaju moralnu odgovornost, pa i on sam.

Članica Nezavisnog odbora je postavila pitanje policijskom komesaru o stanju sa migrantima u Kantonu Sarajevo. Policijski komesar je odgovorio da nema nikakvih promjena i da od strane IOM-a nije ništa urađeno odnosno "sve je na dugu štapu", niti ima ikakvih pomaka sa državnog nivoa.

Članica Nezavisnog odbora se nadovezala na izlaganje policijskog komesara i istakla da je primjećeno putem medija da je pojačana kontrola policijskih službenika (većinom se radi o upozorenjima) nošenja maski od strane građana Kantona Sarajevo. Policijski komesar je odgovorio da je od subote (17.10.2020. godine) krenulo sa pojačanim kontrolisanjem nošenja maski, bazirano na upozorenju jer je cilj da se podigne svijest građana Kantona Sarajevo. Dodao je da se svaki vikend pregledaju ugostiteljski objekti u saradnji sa inspekcijom. Planiraju se racije.

Članica Nezavisnog odbora, je postavila pitanje policijskom komesaru vezano za predstojeće izbore, da li se planiraju određene aktivnosti Uprave policije u smislu formiranja štaba. Policijski komesar je odgovorio da će štab biti formiran na nivou Federacije BiH ali Uprava policije će također imati svoj štab.

Policijski komesar je informisao Nezavisni odbor da je u posljednjih pet-šest dana povećan broj oboljelih policijskih službenika Uprave policije od koronavirusa. U toku je javna nabavka za dodatani broj maski i dezinfekcionih sredstava.

Također, policijski komesar je dodao da je u toku završna faza izrade podzakonskih akata u vezi sa stupanjem na snagu novih zakonskih odredbi o unutrašnjim poslovima i policijskim službenicima. Isti se osvrnuo na Uredbu Vlade Kantona Sarajevo o prioritetnom zapošljavanju djece demobilisanih boraca, RVI i poginulih boraca i šehida kojom se dovode u neravnopravan položaj ostali kandidati, jer se u tom slučaju ne mogu ispoštovati zakonske odredbe da se izabere najbolji kandidat. Zato je i na "čekanju" konkurs za prijem novih policijskih službenika. Ukoliko se krene sa prijemom „iz vana“, po njegovom mišljenju doći će do velikog broja tužbenih zahtjeva zbog diskriminacije.

Policijski komesar je informisao Nezavisni odbor da su u toku aktivnosti Radne grupe vezano za izradu novog zakona o unutrašnjim poslovima a u vezi sa inicijativom zastupnika Aljoše Čampare. Formirane su dvije radne grupe, jednu „predvodi“ ministar unutrašnjih poslova KS a drugu UP. Međunarodna zajednica pritišće na neki način da se što prije donese novi zakon ali u trenutno postavljenim rokovima to neće biti moguće. U svakom slučaju tražit će se produženje rokova. Na sjednici je dogovoreno da članovi Nezavisnog odbora pripreme izjašnjenje Pravobranilaštvu Kantona Sarajevo, kao i odgovor na zahtjeve advokata Alena Nakića i HAYAT TV.

Na tridesettrećoj sjednici održanoj 24.11.2020.godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec oktobar 2020. godine.

Nezavisni odbor je jednoglasno usvojio Odluku o dopuni Poslovnika o radu Nezavisnog odbora .

Nezavisni odbor je sačinio tromjesečni Izvještaj o radu policijskog komesara za period juli-septembar 2020. godine koji je uputio Skupštini Kantona Sarajevo.

Policijski komesar je informisao Nezavisni odbor da je u oktobru 2020. godine zadokumentovano 346 događaja sa obilježjem krivičnog djela protiv imovine, što je za 109 više u odnosu na isti mjesec prošle godine. Najbrojniji događaji sa obilježjem krivičnog djela su: teška krađa – 166, krađa – 113, oštećenje tuđe stvari – 30 i td. Također, evidentirano je 16 otuđenja motornih vozila, od čega su četiri pronađena i vraćena vlasnicima. U mjesecu oktobru 2020. godine evidentirano je pet događaja sa obilježjem krivičnog djela, u kojima je učestvovalo pet maloljetnih lica. U odnosu na isti mjesec 2019. godine smanjen je broj maloljetnih lica za 9 kao i broj događaja sa obilježjem krivičnog djela za 8. U mjesecu oktobru 2020. godine na području Kantona Sarajevo evidentirana su tri događaja aktiviranja minsko-eksplozivnih sredstava usljed čega je nastupila materijalna šteta, te se preduzimaju aktivnosti na rasvjetljavanju ovih slučajeva i pronalaženju učinilaca. Policijski komesar je informisao Nezavisni odbor ok ubistva BH građanina od strane nepoznate osobe – migranta, nalasivši da migranata ima oko 3200 u oba centra po posljednjim informacijama u Kantonu Sarajevo - te da se prema procjeni još cca 60% od ovog broja nalazi u privatnim objektima, skladištima, napuštenim objektima i sl.

Vezano za ubistvo našeg građanina od strane migranata, policijski komesar je istakao da su aktivnosti na rasvjetljavanju ovog krivičnog djela svakodnevne. Uprava policije ima saradnju sa svim drugim institucijama u državi, od svih policijskih agencija, OSA-e itd. te se nada da će počinitelji vrlo brzo biti pronađeni. Naglasio je da je riječ o kompleksnom problemu jer su svi mehanizmi u državi zakazali, da je ova kriza pokazala sve nedostatke sistema od propusnosti granice do nesnalazjenja institucija za rad sa strancima. Također je naveo da se ne može zanemariti i kadrovska nepopunjenost Uprave policije kao i ozbiljan broj službenika zaraženih ili u izolaciji zbog Covid19 virusa. Ceh svega ovoga plaćaju građani ali i policija. U mjesecu novembru je uveden prekovremeni rad iz navedenih razloga što je dodatno usložilo svu situaciju jer su ljudi iscrpljeni.

Istakao je da su okončani i lokalni izbori gdje je policija dodatno angažovana u cilju prije svega održavanja javnog reda i mira i po svim akterima koji su učestvovali u izbornom procesu, svi su pohvalili rad policije u vezi sa lokalnim izborima.

Član Nezavisnog odbora se osvrnuo na akciju "DAR" i iznio da je informisan da je u presretnutim razgovorima u navedenom predmetu jedan „visoko pozicionirani“ dužnosnik MUP-a KS naredio da se propuste određeni kamioni pozivajući se lično na policijskog komesara. Policijski komesar je odgovorio da on nema ništa s tim, da istragu vodi Tužiteljstvo, te da se svako može pozivati na svakog. Naglasio je da on takve stvari ne može spriječiti ali kategorično odbija bilo kakvu vezu sa tim događajem, te tvrdi da je to notorna neistina i da postoje svakako nadležni organi koji trebaju rasvijetliti svačiju ulogu i odgovornost pa i njegovu ako je ima.

Članica Nezavisnog odbora je podsjetila da je policijski komesar na jednoj od prethodnih sjednica rekao da je samo pitanje dana kada će neki migrant ubiti našeg čovjeka, te da je u svim medijima objavljeno da je MUP uhvatio ubicu a kasnije se ispostavilo da ipak nije.

Policijski komesar je istakao da nije tačno da je MUP objavio takvu informaciju, da to ne stoji u izvještajima UP MUP KS, već da su to objavili neki od portala. Naglasio je da takvu izjavu nikada nije dao niko iz MUP-a kao niti njihov glasnogovornik Mirza Hadžiabdić, a to šta pišu pojedini portali i zašto to pišu, on ne može spriječiti.

Članica Nezavisnog odbora je postavila pitanje policijskom komesaru da li je tačna informacija da je taj migrant pretučen što je policijski komesar opovrgnuo. Članica Nezavisnog odbora je iznijela tvrdnju da u posljednje vrijeme Nezavisni odbor uglavnom informacije dobija kroz medije i portale jer o njima nije blagovremeno obavješten od strane policijskog komesara.

Policijski komesar je odgovorio da on nije po zakonu obavezan izvještavati Nezavisni odbor odnosno da to više nije njegova obaveza. Sve što se traženo od njega je dostavljeno, a o ovome nije ništa zatraženo. Policijski komesar smatra da se po pitanju migranata ništa ne može fakturirati policiji, da je u više navrata tražio kamere, postavljanje zaštitnih ograda itd. u više depeša i na više adresa i da će i o tome dostaviti detaljnu informaciju. Članica Nezavisnog odbora se osvrnula i na dopis koji je Nezavisnom odboru dostavila OSA u vezi sugestivnih radnji prepoznavanja od strane policijskih službenika E.K. i O. Č., te je u tom smislu postavila pitanje policijskom komesaru da li je sproveo po tom pitanju bilo kakvu istragu odnosno da li se postupalo po pravilima struke u ovoj radnji.

Policijski komesar je odgovorio da nije naredio istragu, jer je o dopisu OSA-e obaviješten postupajući tužitelj. Sve radnje su se obavljale po dogovoru sa tužiocem a MUP je samo dao tehničku podršku – prostorije, tehniku i što je bilo potrebno. Ako postoje elementi nije problem da se uključi unutrašnja kontrola jer to nije zastarilo ali te radnje su obavljali pod nadzorom tužitelja.

Član Nezavisnog odbora se nadovezao na ranije pitanje vezano za migranate, te je postavio pitanje policijskom komesaru da li se zna broj migranata u privatnim smještajima, njihove lokacije te da li su rađene racije u cilju pronalaska istih.

Policijski komesar je odgovorio da nema tačne podatke te da da nisu rađene racije, ali da policija redovno obilazi određene objekte za koje se sumnja da su sjedišta migranata. Npr. u općini Stari grad Sarajevo ul. Munira Gavrankapetanovića su upadali dva puta. Ima nekoliko lokacija na koje se sumnja te iste se obilaze redovno. Istakao je da je to biznis i da se često dešava da ih danas imate na jednom mjestu, a sutra su već na drugom. Takvih lokacija u svakoj opštini ima na desetak, ali ne mogu službenici policije upadati u privatne posjede bez naloga tužilaštva.

Član Nezavisnog odbora se nadovezao i naglasio da je u jednom periodu to bilo pod kontrolom, a sad više nije, te je u tom smislu postavio pitanje kako je došlo do toga.

Policijski komesar je odgovorio da to nije do policije. Polcijski službenici uhvate migrante i vrate ih u prihvatni centar, a oni su već sutradan vani, idu kud hoće, kada hoće. To će tako biti sve dok se neizmjestite izvan urbanih gradskih sredina a to nije nadležnost policije.

Član Nezavisnog odbora se dotakao nadležnosti državnih organa u pogledu migrantske krize, koja je silom prilika prebačena na MUP Kantona Sarajevo koji nije nadležan u ovom slučaju, te rekao da imaju dva centra i još nove dvije lokacije za smještaj migranata te postavio pitanje da li će to pomoći.

Policijski komesar je odgovorio kako smatra da to neće pomoći, te da će pomoći samo ako se izmjestite izvan grada.

U raspravu se uključila i članica Nezavisnog odbora putem video veze, koja se osvrnula na dešavanja oko ubistva na Otesu, ističući da nije u toku te da ne zna da li je o istome već raspravljano te je postavila pitanje da li je greška koja je nastala rezultat unutrašnjih faktora ili informacija koje su došle izvana.

Policijski komesar je odgovorio da je o tome već dao izjašnjenje i naglasio da su sve aktivnosti i radnje obavljane po nalogu nadležnog tužioca.

Članica Nezavisnog odbora je postavila pitanje dokle se došlo sa izradom podzakonskih akata u skladu sa Zakonom o unutrašnjim poslovima KS i Zakonom o policijskim službenicima, te da li će uskoro početi procedura činovanja policijskih službenika, kao i šta je do sada urađeno vezano za inicijativu koja je usvojena po prijedlogu zastupnika Aljoše Čampare.

Policijski komesar je odgovorio da je potrebno vrlo hitno provesti postupak činovanja i prijema te da rade na tome ubrzano. Izrada podzakonskih akata je u toku a aktivnosti po inicijativi zastupnika Čampare su stavljene trenutno po strani.

Član Nezavisnog odbora je postavio pitanje policijskom komesaru vezano za izdatu potjernicu za Sašom Golubom koji je u bjekstvu i licem za koje se sumnja da je izvršilac krivičnog djela ubistva na štetu Nedžiba Saphića zvanog Điba?

Policijski komesar je odgovorio da je zadnja informacija koju imaju je da se nalazi u Beču jer tamo ima nekog rođaka, potjernica se ralizuje preko Interpola, koliko se sjeća (nije 100% siguran).

Član Nezavisnog odbora je predložio policijskom komesaru da MUP KS raspiše nagradu za indentifikaciju i pronalaženje ubice i njegovih saučesnika – vezano za ubistvo našeg građanina od strane migranata, te da bi možda za novac neki od njih odao počinitelja/počinitelja i da bi to možda doprinjelo bržem otkrivanju. Policijski komesar je rekao da raspisivanje nagrade nije u nadležnosti MUP-a KS nego Vlade Kantona Sarajevo.

U oktobru 2020. godine predstavnici Nezavisnog odbora prisustvovali su sjednicama Komisije za sigurnost i Zakonodavno pravne komisije Skupštine Kantona Sarajevo radi prezentiranja Izvještaja o radu Nezavisnog odbora za period mart 2020. godine - avgust 2020. godine, odnosno Izvještaja o radu policijskog komesara za period april-juni 2020. godine.

Na tridesetčetvrtoj sjednici, održanoj 22.12.2020. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec novembar 2020. godine.

Policijski komesar je na navedenoj sjednici iznio podatak da je u mjesecu novembru 2020. godine na području Kantona Sarajevo, prema službenim evidencijama Uprave policije MUP-a Kantona Sarajevo, broj događaja sa obilježjem krivičnog djela smanjen za 19% u odnosu na isti mjesec prethodne godine. Također, u navedenom periodu zabilježen je smanjen broj imovinskih delikata u odnosu na isti mjesec 2019. godine. Iznio je da su se u ovom mjesecu desila dva ubistva koja su uspješno rasvijetljena te počinioci privedeni pravdi (strani državljani). Iznio je da je potpisan novi Protokol o saradnji Tužilaštva Kantona Sarajevo sa Upravom policije MUP-a Kantona Sarajevo kojim se preciznije i jasnije regulišu međusobni odnosi, prava i obaveze strana, te je dogovorena kvalitetnija saradnja posebno sa aspekta održavanja obuka i za uposlenike Uprave policije i za uposlenike Tužilaštva Kantona Sarajevo. Policijski komesar je istakao da je u ovom periodu UP MUP-a Kantona Sarajevo uputila više prijedloga zakonskih akata ministru MUP-a kako bi se isti "pustili" u vladinu i skupštinsku proceduru, te su imenovani članovi radnih grupa za izradu uredbi. Također u mjesecu novembru 2020. godine više pravilnika je objavljeno u Službenim novinama Kantona Sarajevo, odnosno stupilo na snagu. Uredba o oduzimanju činova je dostavljena ministru unutrašnjih poslova Kantona Sarajevo. Navedena uredba je osnov za izradu Pravilnika o unutrašnjoj organizaciji i sistematizaciji radnih mjesta.

Član Nezavisnog odbora postavio je pitanje policijskom komesaru u vezi sa migrantima u Kantonu Sarajevo u smislu da ide zima, migranti će očigledno ostati na području Bosne i Herecegovine, da li se očekuje zatvaranje kampova i priliv novih migranata, te da li je dovoljan broj policijskih službenika da se nosi sa trenutnom migrantskom krizom. Odgovarajući na ovo pitanje policijski komesar je istakao da je smanjen priliv migranata kako zbog pandemije korona virusom tako i zbog hladnoće. Prije nekoliko noći došlo je do sukoba migranata porijeklom is Afganistana i

Pakistana gdje su policijski službenici morali intervenirati a dvojica migranata su zadobila povrede. Odjednom se skupilo njih oko 200 te je na teren moralo izaći veći broj policijskih službenika, 30 ih je lišeno slobode i trojica njih koji su započeli napad. Sektoru za policijsku podršku je naređeno da moraju biti spremni da odmah intervišu (u roku od 10 do 15 minuta). Pojačana je kontrola migranata pogotovo na raskrscima u smislu oduzimanja hladnog oružja. Pronađeno ih je nekoliko na području Starog grada, Novog Sarajeva i Ilidže bez pasoša te su predati pod nadzor Službi za poslove sa strancima. Što se tiče nedostatka broja policijskih službenika stanje u Upravi policije je takvo da se sa raspoloživim ljudstvom pokušava pokriti dva kampa u okolini glavnog grada.

Član Nezavisnog odbora osvrnuo se na nedavni događaj u banci u centru grada gdje je policijski službenik prema podacima iz medija u samoodbrani upotrebio vatreno oružje i da li su tačne informacije da je tužilaštvo protiv istog pokrenulo istragu. Policijski komesar je odgovorio da je policijski službenik je saslušan u svojstvu osumnjičenog. Policijski komesar je istakao da je on naredio da se angažuje advokat. Također, reagovao je Sindikat što je bilo i očekivano.

Članica Nezavisnog odbora je istakla da su se i prije dešavali događaji u kojima su policijski službenici upotrebljavali vatreno oružje ali da se u te događaje nije uključivao tužilac niti je bilo istrage. U tom smislu je istakla da ovaj događaj onda mora biti po nečemu drugačiji te se također osvrnula na događaj iz medija u kojem je u dvorištu kuće ustreljen pas i to od strane policijskog službenika.

Policijski komesar je istakao da će ukoliko se utvrdi da je policijski službenik neovlašteno koristio vatrenu oružje (vezano za događaj sa psom) isti biti suspendiran i krivično gonjen.

Članica Nezavisnog odbora je istakla da je na jednoj od predhodnih sjednica bilo govora o kupovini mobilnog aparata od strane bivšeg komesara, gdje je isti plaćen novcem iz Budžeta a nigdje nije zaveden niti je razdužen odlaskom sa funkcije. Da li se u međuvremenu nešto dešavalo po tom pitanju. Policijski komesar je dogovorio da je 16.10.2020. godine Tužilaštvu dostavljen Izvještaj na odluku i postupanje a aktom od 02.12.2020. godine dostavljen je operativni materijal (službena zabilješka, prijedlog za izdavanje naredbe za BH Telekom u smislu gdje je nalazi telefon i telefonska kartica).

Član Nezavisnog odbora je postavio pitanje komesaru da li je ikada utvrđeno ko je izradio Pravilnike o poklonima, koje je potpisao bivši komesar i na osnovu kojih je trošio novac (o istima je bilo riječ na nekim od ranijih sjednica Nezavisnog odbora). Policijski komesar je odgovorio da se do sada nije se utvrdilo ko je izradio Pravilnike.

Član Nezavisnog odbora je postavio pitanje policijskom komesaru vezano za razbojništvo, da li se nešto planski radi po tom pitanju odnosno da li ima nekih preventivnih aktivnosti. Policijski komesar je odgovorio da sve PU imaju planove po kojima se postupa u zavisnosti koja djela najviše provladavaju na teritoriju PU npr. krađe, razbojništva i sl. Svi oblici kriminala su više-manje pokriveni.

Član Nezavisnog odbora je konstatovao da su u predhodnom razdoblju "frizirani" izvještaji koje je podnosila Uprava policije, kao i upisnici sa kojim se svjesno „mešetarilo“ te je na osnovu istih prikazivana rasvjetljenost krivičnih djela oko 60% što je rezultat koji nijedna policija u svijetu nije mogla da ostvari, te je u tom smislu postavio pitanje da li je potrebno izvršiti reviziju Strategije koja je na snazi još jednu godinu, kao i akcionih planova koji su nastali na osnovu pomenute Strategije, kao i drugih dokumenata jer osnovni podaci na kojima su bazirani navedeni dokumenti nisu tačni. Policijski komesar je istakao da će Uprava policije kroz Program rada i generalni plan se referirati na približno realne pokazatelje i na osnovu njih donositi akcione planove. Također je istakao da je svjestan da je bilo nerealnih izvještaja te smatra da se kroz naprijed navedeni način to može prevazići te da se eventualno krene sa revidiranjem Strategije iako je ista na snazi još godinu dana. Do sada je Uprava policije imala tri dokumenta sa istim sadržajem odnosno regulisali su istu materiju. Treba naći pravni osnov za sve.

Član Nezavisnog odbora je postavio pitanje policijskom komesaru u vezi sa brojem policijskih službenika s obzirom na pandemiju korona virusom te da li će uskoro biti raspisan konkurs za prijem novih policijskih službenika. Policijski komesar je odgovorio da je trenutno 50-60 ljudi van stroja, ali se svakim danom situacija popravlja. U toku su pripreme za raspisivanje konkursa ali

prethodno moraju biti ispunjeni određeni uslovi. Ponovno je istakao da Uredba Vlade Kantona Sarajevo u vezi sa dodatnim bodovima za šehidske porodice u praksi može stvoriti osnov za žalbe obzirom da Zakon o policijskim službenicima definiše da se bira najbolji kandidat. Osim toga, i nakon prijema policijski službenici će po okončanju obuke tek za jednu godinu biti operativno sposobni. Također, ako se stvore uslovi moguće je početi sa činovanjem u čin mlađeg inspektora. Nezavisni odbor je mišljenja da je policijski komesar u obavezi provoditi propise, te da shodno tome hitno treba raditi na završetku Pravilnika o unutrašnjoj organizaciji i sistematizaciji, te raspisati konkurs za prijem policajaca. Nezavisni odbor smatra da ni jedan rukovodilac, uključujući i policijskog komesara, ne može sebi dati za pravo da raspravlja o propisima i da predviđa eventualne posljedice zbog provođenja istih.

Nezavisni odbor donio je zaključak da se pripremljena informacija u vezi sa presudom Kantonalnog suda Sarajevo u predmetu policijskog službenika S.K. protiv Vlade Kantona Sarajevo, MUP-a Kantona Sarajevo i Policijskog odbora MUP-a Kantona Sarajevo. dostavi nadležnim institucijama.

Na tridesetpetoj sjednici, održanoj 19.01.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec decembar 2020. godine. Policijski komesar je u svom kratkom izlaganju istakao da je u mjesecu decembru 2020. godine na području Kantona Sarajevo registrovano 447 događaja sa obilježjem krivičnog djela što je više za 5,9% u odnosu na isti mjesec prethodne godine. Također, rasvjetljenost krivičnih djela povećana je u odnosu na isti mjesec prošle godine. Policijski komesar je dodao da je prošli mjesec uveden prekovremeni red te je došlo do smanjenje krivičnih dijela za 20%. Naglasio je da je u ovom periodu bilo je dosta aktivnosti koje su raspoloživi broj dostupnih policijskih službenika Uprave policije doveli do krajnjih mogućnosti. Policijski komesar je istakao da je za vrijeme vikenda na okolnim planinama (Trebević, Bjelašnica i Igman) boravio je veliki broj građana Sarajeva što je iziskivalo povećan broj policijskih službenika. Istakao je da je u ovom periodu (decembar 2020. godine) zabilježeno blago povećanje krivičnih djela iz oblasti imovinskih delikata (razbojništva, krađe paljevine). Postoji plan po kojem većina Sektora i PU postupaju u zavisnosti od situacije, što znači da pojačavaju mjere u zavisnosti koja krivična djela preovladavaju u datom periodu. Usmeno je naloženo načelnicima Sektora kriminalističke policije da se opet provode naložene mjere a razlog za to je povećanje broja migranata, kapacitiranosti Uprave policije i sl. Većina ovih slučajeva (paljevine) odnosi se na obračune između kriminalnih grupa tako da oštećeni ne žele da surađuju sa organima reda i zakona. Povećan je broj prekršaja koji se odnose na remećenje javnog reda i mira prije svega zbog naredbe Kriznog štaba u smislu nošenja zaštitinih maski. U narednom periodu očekuje se angažovanje policijskih službenika po naredbi Federalnog kriznog štaba u pogledu kontrole ugostiteljskih objekata, zatvorenih prostora i sl.

Što se tiče broja saobraćajnih nesreća došlo je do značajnog smanjenja istih (razlog ograničeno kretanje).

Član Nezavisnog odbora postavio je pitanje policijskom komesaru da li su prikazani statistički podaci u navedenoj Informaciji realni (period novembar i decembar 2020. godine). Policijski komesar je odgovorio da su prikazani podaci za novembar i decembar 2020. godine realno uporedivi sa podacima iz istog perioda prethodne godine.

Nezavisni odbor je napomenuo policijskom komesaru da on još uvijek nije dostavio detaljan tromjesečni izvještaj o svom radu te je zatražio da izvještaj dostavi što je moguće prije.

Sumirajući proteklu 2020. godinu, član Nezavisnog odbora je postavio pitanje policijskom komesaru šta je urađeno a šta nije po programu rada koji je komesar dostavio prilikom konkurisanja za tu poziciju. Zamolio je komesara da istakne koje su to subjektivne a koje objektivne okolnosti zbog kojih se eventualno neke planirane aktivnosti nisu realizovale. Također je postavio pitanje policijskom komesaru koje se odnosi na Pravilnik o korištenju službenih vozila (PU Iliža) jer ima saznanja da se pojedina službena vozila koriste u privatne svrhe od strane pojedinih policijskih službenika (policijski službenik Š.) koji svaki dan službenim vozilom dođe po drugog kolegu (policijski službenik P.A.) i vozi ga na posao.

Policijski komesar je odgovorio da će na pitanje vezano za realizaciju svog programa rada dostaviti u pisanoj formi. U vezi sa upotrebom službenih vozila policijski komesar je odgovorio da niko od

uposlenika nema pravo koristiti službena vozila u privatne svrhe. Istakao je da će provjeriti izložene informacije i dostaviti odgovor u pisanoj formi.

Policijski komesar je obavijestio članove Nezavisnog odbora o događaju od (18.01.2021. godine) gdje je patrola na Hrasničkoj cesti zaustavila vozilo u kom se nalazio pripadnik policije, a iz kog je neposredno prije zaustavljanja izbačena bijela kesa sa prahom (sumnjivom materijom-narkotikom). Za volanom vozila bio je policajac Policijske uprave Hadžići. Preduzete su sve aktivnosti, isti je lišen slobode i ići će izvještaj po nalogu tužioca. Vrlo je izvjesno da će taj policijski službenik biti suspendovan, a po naredbi sudije za prethodni postupak uzet je uzorak sluznice.

Član Nezavisnog odbora je postavio pitanje policijskom komesaru kakvo je njegovo mišljenje u vezi sa intervjuima koje u posljednje vrijeme daje stari/novi ministar unutrašnjih poslova a u vezi sa kupovinom helikoptera i spominjanja specijalne jedinice koja se trenutno nalazi u sastavu Uprave policije i da li isti osjeća eventualno neki politički pritisak. Policijski komesar je odgovorio da što se tiče helikopterske jedinice prema njegovim saznanjima ista bi bila formirana pri MUP-u Kantona Sarajevo a helikopter(i) bi bili višenamjenski. Obzirom da je riječ o projekatu Vlade Kantona Sarajevo policijski komesar nema nikakve nadležnosti. Ono što mu je poznato jeste da se raspitalo na koji način je ova jedinica organizovana u FMUP-u i tamo se ista također nalazi u sastavu ministarstva. Također je dodao da dok je on policijski komesar politika neće imati nikakav uticaj te naglasio jako dobru saradnju i sa bivšim i novim/starim ministrom unutrašnjih poslova Kantona Sarajevo.

Članica Nezavisnog odbora je postavila pitanje komesaru vezano za dio Izvještaja za decembar 2020. godine u kojem se navodi da je Uprava policije poduzimala aktivnosti u cilju uspostavljanja saradnje sa građanima i mjesnim zajednicama itd. te u tom smislu postavila pitanje koje su to konkretno aktivnosti poduzete obzirom da je evidentno da se u tom djelu kao rad u zajednici navode: treninzi, online radionice i sl. Istakla je da građani odnosno mjesna zajednica na kojoj ona živi ne primjećuje policijske službenike niti se vidi bilo kakav oblik saradnje građana sa policijom a okruženi su migrantima (Dom penzionera u kojem se često dešavaju paljevine od strane migranata), te smatra do u ovom dijelu baš nema aktivnosti koje se navode u izvještaju.

Odgovarajući na ovo pitanje policijski komesar je istakao da je svaka mjesna zajednica podjeljena na sektore. Nažalost, nijedna nema policijsku stanicu a 30-40% njih nema vođu stanice. Prema raspoloživosti ljudstva pokušava se balansirati. Treba napomenuti da UP nedostaje nekoliko stotina policajaca. Patrole policajaca u vozilima služe samo za intervenciju. Nedostaje tzv. "kvartovskih policajaca" koji bi upoznali stanovništvo kvarta ili mjesne zajednice. Pokušat će se iz postojeće organizacije izvući maksimum. Ima jednu ideju koju će izložiti prema Vladi Kantona Sarajevo da se putem internog oglasa prime službenici iz drugih agencija (ukoliko se ne raspolaže sa ljudima određenih kvalifikacija/kompetencija). Potrebno je dopuniti član Zakona o policijskim službenicima koji će omogućiti da se u nedostatku npr. 250-300 ljudi odmah može primiti njih 100. Ono što je sigurno je da će u periodu od 2023-2025. godine više stotina policijskih službenika otići u penziju.

Član Nezavisnog odbora je postavio pitanje policijskom komesaru zašto do sada nije bilo prijema policijskih službenika te zašto se nisu tražile izmjene zakona koje bi omogućile upošljavanje policajaca. Policijski komesar je odgovorio da je navedeno traženo.

Članica Nezavisnog odbora je postavila pitanje policijskom komesaru kada se može očekivati raspisivanje konkursa za prijem novih policijskih službenika, kao i postupak činovanja obzirom da su davno stupile na snagu izmjene zakona zbog kojih se ranije nisu mogle provesti navedene aktivnosti. Da li je u pitanju samo Uredba kojom su predviđeni dodatni bodovi za članove šehidskih porodica ili je u pitanju nešto drugo.

Policijski komesar je odgovorio da nije u pitanju samo Uredba Vlade Kantona Sarajevo to je samo jedan od mogućih problema ali o navedenom će članovi Nezavisnog odbora biti informisani pisanim putem.

Članica Nezavisnog odbora se osvrnula na Pravilnik o izgledu, dijelovima i boji posebne uniforme i dopunskih dijelova uniforme policijskih službenika Uprave policije koji je objavljen nedavno u Službenim novinama Kantona Sarajevo te postavila pitanje policijskom komesaru ukoliko može da uporedi šta su to razlike novog i starog Pravilnika obzirom da i novi Pravilnik u svom prilogu ima

detaljno nacrtane uniforme sa brojem šavova i sl. Odgovarajući na pitanje policijski komesar je istakao da ovim novim pravilnikom je utvrđena jedinstvena uniforma a stari pravilnici su stavljeni van snage. Sada su sve uniforme obuhvaćene jednim Pravilnikom. Prva uniforma koju Uprava policije bude nabavljala ista će biti u skladu sa Federalnom uredbom. Vraćaju se šapke kao u svim kantonima (do sada su bili kačketi). Naglasio je da se uniforma odnosno njen izgled morao detaljno propisati.

Članica Nezavisnog odbora je upoznala komesara sa dopisom TV Hayat te da je u istom Nezavisni odbor zamoljen da mu postavi pitanje u vezi sa zabranom snimanja emisije Slučajevi X. Ne ulazeći u opradanost donesene odluke na šta policijski komesar u svakom slučaju ima pravo, ista je postavila pitanje policijskom komesaru da li želi prokomentirati navedeni dopis.

Policijski komesar je istakao da o određenim detaljima iz snimanja ove emisije ne može pričati iz objektivnih razloga. Zbog profesionalnih razloga i krizne situacije izazvane pandemijom (Covid 19) procjenjeno je da se prekine saradnja na snimanju ove serije. Svim tv kućama pa tako i TV Hayat je zabranjeno da ulaze u službene automobile ali nije zabranjeno da snimaju policijske službenike sa određene udaljenosti na način da ne ometaju policijske službenike u njihovom radu.

Članica Nezavisnog odbora je postavila pitanje policijskom komesaru da li postoji starosna granica za odlazak policijskih službenika u penziju.

Policijski komesar je odgovorio da je ta granica 55 godina života.

Članica Nezavisnog odbora je postavila pitanje policijskom komesaru vezano za jednu od ranijih situacija (za koju je također i ranije postavljala pitanja), a odnosi se na početak pandemije korona virusa kada su neki od viših policijskih službenika (načelnici) odbili da izvrše zakonitu naredbu policijskog komesara, da li je pokrenut disciplinski postupak protiv istih, odnosno da li je donesena Uredba o kojoj je policijski komesar ranije govorio a odnosi se na mogućnost oduzimanja činova. Policijski komesar je odgovorio da nije pokrenut disciplinski postupak i da se još čeka na donošenje Uredbe koja će u organizacionom smislu omogućiti pomjeranje policijskih službenika na način da se neki od njih motiviraju još više za rad a neki „natjeraju“ da rade.

Član Nezavisnog odbora osvrnuo se na nedavne paljevine automobila te postavio pitanje policijskom komesaru da li u tom smislu ima nešto novo odnosno da li se uspjelo nešto „zadokumentovati“ odnosno da li ima određenih pomaka u istragama. Policijski komesar je odgovorio da ima određenih pomaka ali su ta djela najteža za dokazivati. U većini slučajeva isti se dešavaju zbog „neraščišćenih računa“ te „oštećeni“ odbijaju da sarađuju sa policijom. U većini slučajeva nema kamera niti svjedoka.

Član Nezavisnog odbora osvrnuo se na ranije izlaganje policijskog komesara vezano za mali broj policijskih službenika te da je određeni broj njih morao za vikend biti angažovan na okolnim planinama te u tom smislu postavio pitanje da li postoji mogućnost popravke saobraćajne infrastrukture. Policijski komesar je odgovorio da postojeća infrastruktura ne prati razvoj okolnih planina, posebno Bjelašnice što predstavlja veliki problem. Povećan je broj građana koji svakodnevno (u kontinuitetu) živi na Bjelašnici i dolazi u grad na posao.

Član Nezavisnog odbora postavio je više pitanja policijskom komesaru i to:

-Koje su konkretne mjere poduzete od strane Uprave policije u prevenciji krivičnih djela: razbojništava, krađa, svih oblika nasilja a posebno vršnjačkog nasilja?

-Koje su konkretne mjere poduzete od strane Uprave policije u spriječavanju krivičnih djela izazivanja opće opasnosti upotrebom eksplozivnih sredstava i smanjenja posjedovanja nelegalnog oružja?

-Koje su konkretne mjere poduzete od strane Uprave policije na upravljanju kriznom situacijom vezanom za kriminalitet koji prijete os trane migrantske populacije i šta ste poduzeli na uklanjanju migranata sa raskrsnica gdje prose za novac?

-Da li svi pripadnici saobraćajne policije znaju raditi uviđaj saobraćajnih nezgoda i ako ne znaju zašto su raspoređeni u tu jedinicu ako joj je to primarni zadatak?

-Koliko često organizujete sastanke sa top menadžmentom (svim glavnim inspektorima)? Kada ste zadnji put održali sastanak i koje ste konkretne mjere analizirali i poduzeli?

-Koji su to konkretni primjeri javnih pohvala i nagrada za policijske službenike koji su uzor dobrog rada, znanja, sposobnosti i etičkog ponašanja pri izvršavanju zadataka kao moralni poticaj drugim policajcima?

-Koje su to konkretne mjere koje policija poduzima na prevenciji narkomanije?

-Osim akcije u kojoj su pohapšeni policijski službenici, koje mjere i aktivnosti ste poduzeli na prevenciji korupcije?

Na naprijed navedena pitanja policijski komesar će dostaviti odgovor pismenim putem.

Policijski komesar je obavijestio članove Nezavisnog odbora da su u proteklom periodu bile dvije eksplozije u Vogošći, a nedavno i treća. Uprava policije je uspjela dobiti naredbu za „pretres žrtve napada“. Isti je zaustavljen i kod njega je pronađena manja količina droge i prepravljeni pištolj a u kući su pronađeni vaga i 8 pištolja te veća količina droge. Jako je bitno da isti bude pritvoren kako bi se Uprava policije mogla usmjeriti na drugo lice.

Član Nezavisnog odbor upoznao je policijskog komesara sa anonimnom predstavkom koja je dostavljena Nezavisnom odboru, a koja se odnosi na dodjeljeni čin komesaru u periodu 2003-2004. godina, prije nego što je postao glavni inspektor.

Postavio je pitanje policijskom komesaru u vezi sa policijskim službenikom koji je upotrijebio vatreno oružje u banci i protiv kojeg je otvorena istraga. Policijski komesar je odgovorio da je opravdao upotrebljenu silu a prethodno je Uprava policije tražila da se pozovu svjedoci ili da Tužilaštvo dostavi izjave svjedoka. Obzirom da do toga nije došlo a isticao je rok za donošenje odluke, odlučeno je u skladu sa raspoloživim podacima.

Član Nezavisnog odbora se osvrnuo na nedavni događaj hapšenja policijskih službenika zbog korupcije te naglasio da ono što možemo vidjeti iz medija jeste da je uhapšen veliki broj policijskih službenika. Postavio je pitanje da li se možda razmišljalo o nekim premještajima jer je nemoguće da nadređeni službenici nisu znali šta im uposlenici radi odnosno ako nisu znali onda nisu sposobni da rade taj posao. Policijski komesar je rekao da uvijek postoje dileme i da sa postojećim ljudskim kapacitetima nema puno izbora. Saobraćajna jedinica je uvijek važila za jednu od specijalističkih jedinica i u njoj bi trebali da budu najbolji odnosno najstručniji policijski službenici. Istakao je da nije problem samo samo saobraćaj. Pokrenute su određene procedure za nabavku body kamera za pripadnike policije i svi podaci će biti pohranjeni i dostupni za svaku situaciju. Na taj način će se smanjiti korupcija u Upravi policije. Naglasio je da veliki problem ima i sa pripadnicima saobraćajne policije u kojoj su se formirali određeni klanovi. Tužilaštvo ne želi pokrenuti ni jedan postupak protiv službenih lica ako se ne sprovedu predistražne radnje protiv istih. Bilo je sporadičnih prijava na rad pripadnika policije ali se vrlo teško dolazi do opipljivih dokaza. Dodao je da ima prostora i za raspoređivanje ali je Uredba o dodjeli i oduzimanju činova osnov za sistematizaciju. Sljedeće sedmice će se održati sastanak sa ministricom pravde i šefom Ureda za borbu protiv korupcije.

U raspravu se uključio i član Nezavisnog odbora, koji je istakao da pomoćnici komandira sastavljaju raspored policijskih službenika i po njegovom mišljenju nemoguće je da pomoćnik komandira odnosno načelnici nisu znali šta rade policijski službenici. Policijski komesar je dodao da po toj logici svi su znali i svi su krivi. Bilo je tu niz subjektivnih i objektivnih okolnosti. Uvijek je bilo sporadičnih prijava ljudi sa ulice ali je to bilo teško zadokumentovati i dokazati. Istakao je da on ima povjerenja i u komandira i u zamjenika i dva pomoćnika i da su to korektni i sposobni ljudi.

Članica Nezavisnog odbora, postavila je pitanje policijskom komesaru u vezi navodnog ubistva psa od strane policijskog službenika, da li je završena istraga. Policijski komesar je odgovorio da misli da je vještačenje završeno i da nisu pronađeni tragovi na rukama policijskog službenika

Također se osvrnula na raniju situaciju vezano za prijavu službenika OSA-e vezano za službenu radnju prepoznavanja da je policijski komesar ranije odgovorio da je policijski službenik koji je učestvovao na bolovanju te da li je pokrenuta istraga. Policijski komesar je odgovorio da je policijski službenik, koliko je njemu poznato, još uvijek na bolovanju i da je dao nalog unutrašnjoj kontroli.

Članica Nezavisnog odbora, se nadovezala na ranije postavljeno pitanje člana Nezavisnog odbora, te postavila pitanje policijskom komesaru da li je održavanje kolegija odnosno njegova obaveza definisana nekim podzakonskim aktom. Policijski komesar je odgovorio da nije.

Član Nezavisnog odbora, je istakao da je u proteklom periodu donesena Presuda Kantonalnog suda po žalbi policijskog službenika S.K. vezano za nezakonitosti prilikom činovanja policijskih službenika. Ne ulazeći u sadržinu presude, postavio je pitanje policijskom komesaru zašto je u dva navrata traženo mišljenje Nezavisnog odbora u vezi sa izvršenjem presude. Policijski komesar je odgovorio pitanjem da li Nezavisni odbor vrši nadzor nad njegovim radom odnosno da li je Nezavisni odbor tu „samo da skida glave“ ili da pomogne. Naglasio je da se on nije obratio za mišljenje samo Nezavisnom odboru nego i nekim drugim institucijama koje su odgovorile na sličan način kao i Nezavisni odbor.

Nezavisni odbor je imao jednoglasan stav u pogledu sadržaja akta koji će proslijediti novinama emisije „Slučajevi X“ TV Hayat, kao i da se anonimne prijave koje se odnose na činovanje policijskog komesara prosljede Kantonalnom tužilaštvu Kantona Sarajevo, Uredu za borbu protiv korupcije i upravljanje kvalitetom KS, Inspektoratu KS-radnoj inspekciji, te Predsjedavajućem Skupštine Kantona Sarajevo.

Na tridesetšestoj sjednici, održanoj 17.02.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec januar 2021. godine.

Nezavisni odbor je sačinio detaljan Izvještaj o radu policijskog komesara Uprave policije Ministarstva unutrašnjih poslova Kantona Sarajevo za vremenski period oktobar – decembar 2020. godine koji je upućen u skupštinsku proceduru.

Na navedenoj sjednici policijski komesar je iznio stanje sigurnosti na području Kantona Sarajevo. Istakao je da je u ovom periodu zabilježen jedan pokušaj ubistva kao i nanošenje 10 teških ozlijeđa i veći broj lakih tjelesnih ozlijeđa. U januaru 2021. godine evidentirana su 234 događaja sa obilježjem krivičnog djela što je za 36% manje u odnosu na isti mjesec prošle godine. Iz ove oblasti najbrojniji događaji sa obilježjem krivičnog djela su teška krađa – 93, krađa – 72, razbojništvo– 31 ... U mjesecu januaru zabilježeno je aktiviranje minsko-eksplozivnog sredstva, kao i 13 požara. Ovi požari su registrovani na m/v kao i na objektima stanovanja. Policija je zabilježila smanjen broj saobraćajnih nezgoda u kojima je 1 lice smrtno stradalo, kontrolisano je preko 14000 m/v i vozača.

Na kraju svog izlaganja komesar se dotakao i trenutne sigurnosne situacije sa stanovišta migranata. Prema zadnjim informacijama sa kojima raspolaže Uprava policije u Kantonu Sarajevo trenutno se nalazi 3980 migranata. Policijski komesar se osvrnuo na nedavne neredne koji su se desili u migrantskom kampu u Blažuju gdje je povređen određen broj policajaca i uništeno više službenih vozila. Istakao je da zajedno sa ministrom unutrašnjih poslova i predstavnicima općinskog suda na pokušavaju iznaći način za prekršajno procesuiranje migranata. Pripremljeni su akti kojim se traži izmjena određenih odredbi Zakona o prekršajima.

Članica Nezavisnog odbora postavila je pitanje komesaru vezano za pravilnike koji su bili tema ranijih sjednica a koje je donio bivši policijski komesar Halilović i na osnovu kojih je potrošeno oko 20.000 KM, da li je otkriveno ko je kreirao te pravilnike. Policijski komesar je odgovorio da nije mogao da utvrdi ko je kreirao iste i cjelokupna dokumentacija je dostavljena Tužilaštvu Kantona Sarajevo, o čemu je već ranije obavijestio Nezavisni odbor. Po njemu se ovdje radi o pravilnicima koje je donio bivši policijski komesar Halilović i jedino što je on mogao jeste da sve prosljedi Tužilaštvu. Ne zna se ko je radio na tim pravilnicima, a dosta ljudi iz tog perioda se više ne nalazi u organizacionim jedinicama Uprave policije.

Nadovezujući se postavljeno pitanje, članica Nezavisnog odbora je postavila pitanje policijskom komesaru da li raspolaže sa informacijama da je u tom slučaju bilo formirano neko radno tijelo/komisija i slično čiji članovi su izradili te pravilnike. Policijski komesar je odgovorio da nije bila formirana komisija niti neko radno tijelo te da su svi dostupni dokazi su prosljeđeni Tužilaštvu. Naglasio je da se u arhivi MUP-a nisu mogli naći bilo kakvi dokumenti o formiranju radnog tijela.

Član Nezavisnog odbora postavio je pitanje policijskom komesaru da li je neko uzeo izjavu od bivšeg komesara Halilovića. Policijski komesar je odgovorio da nije jer se čeka nalog Tužilaštva.

Primjenom tih pravilnika potrošeno je između 20.000-25.000 KM. Prilikom donošenja tih pravilnika nisu se pribavila mišljenja niti Ministarstva pravde niti Ministarstva finansija.

Član Nezavisnog odbora se osvrnuo na nedavne događaje u migrantskom centru u Blažuju prilikom kojih je došlo do oštećenja materijalno-tehničkih sredstava Uprave policije. U tom smislu je postavio pitanje policijskom komesaru, da li je Uprava policije uskraćena za normalni rad i ima li mnogo sredstava koji će se morati otpisati. Policijski komesar je odgovorio da je na dva vozila počinjena totalna materijalna šteta dok se kod ostalih pristupilo njihovom popravku. Procjena načinjene štete je oko 65.000 KM. Ova cifra se odnosi na vozila koja su potpuno oštećena. Sva vozila su kasko osigurana. Na sastanku koji je održan sa predstavnicima IOM-om traženo je da se iz dostavljenog spiska izbacii specifikacija sredstava za zaštitu te je traženo da se odrede prioriteta od strane Uprave policije.

Član Nezavisnog odbora se nadovezao i postavio pitanje da li je ijedna osoba tu noć lišena slobode. Policijski komesar je odgovorio da je sutradan uhapšeno 11 ili 12 migranata koji su predati Službi za poslove sa strancima na dalji postupak. Još uvijek je taj predmet otvoren i jako veliki problem je bila identifikacija lica (migranata). Nijedan snimak koji je dobila Uprava policije se ne prihvata kao zakonit osim snimaka sa servera IOM-a a za to se još uvijek čeka naredba Tužilaštva.

Član Nezavisnog odbora je dodao da ako niko nije lišen slobode tu noć da je to bruka, posebno sa stanovišta da nisu upotrebljena sredstva prinude. Policijski komesar je istakao da je lako biti general poslije bitke. Naglasio je da je čista sreća da dvadeset ljudi nije povrijeđeno tu noć.

Članica Nezavisnog odbora je istakla da je u jednom od dostavljenih izvještaja (o radu policijskog komesara ili Uprave policije) uočila da je navedeno da je formiran operativni tim za migrante. U tom smislu je postavila pitanje policijskom komesaru da li to znači da je Uprava policije formirala operativni tim za migrante ili ne. Policijski komesar je odgovorio da je to operativni tim koji je formiran na državnom nivou čiji su članovi on i Dž.H. a na nižem nivou član je policijski službenik iz Uprave policije, A.M..

Članica Nezavisnog odbora je postavila je pitanje policijskom komesaru ko je tu noć rukovodio akcijom (misli se na nemili događaj u migrantskom kampu u Blažuju) i da li je on prisustvovao. Policijski komesar je odgovorio da je akcijom rukovodio M.H. i da on nije bio prisutan.

Član Nezavisnog odbora se osvrnuo na mobilni aparat koji je kupljen od strane bivšeg komesara Halilovića i koji se ne nalazi u Upravi policije a evidentirano je da je nabavljen te je u tom smislu postavio pitanje policijskom komesaru o kojem modelu mobilnog aparata je riječ i koliko isti vrijedi. Policijski komesar je odgovorio da je u pitanju neki noviji model mobilnih aparata a vrijednost je otprilike oko 1.900 KM. Komesar je naglasio da je sva dokumentacija o ovom slučaju predata Tužilaštvu na dalje postupanje o čemu je ranije već obavijestio Nezavisni odbor i nema novih saznanja po tom pitanju.

Član Nezavisnog odbora se osvrnuo na dostavljene odgovore policijskog komesara na pitanja koja su članovi Nezavisnog odbora postavili na prethodnoj sjednici. Jedno od pitanja odnosilo se na korištenje službenog vozila Uprave policije u privatne svrhe prije svega u PU Ilidža. Postavio je pitanje policijskom komesaru da li je policijski službenik A.P. imao odobrenje policijskog komesara za upotrebu tog vozila. Policijski komesar je odgovorio da nije tačno da je pomenuti policijski službenik koristio stalno službeno vozilo u privatne svrhe. Pomenuti policijski službenik ima njegovu odobrenje za korištenje službenog vozila u privatne svrhe. Dodao je da nema elemenata za zabranu korištenja m/v za načelnika PU Ilidža. On smatra da za vrijeme dok se on nalazi na čelu Uprave policije mogućnost korištenja službenih vozila u privatne svrhe je svedena na minimum.

Članica Nezavisnog odbora se nadovezala na ranije pitanje i postavila pitanje policijskom komesaru da li je svoj stav/mišljenje da službeno vozilo nije korišteno u privatne svrhe, odnosno da ne postoje elementi zloupotrebe korištenja službenog vozila i informaciju koju je kao takvu poslao Nezavisnom odboru temeljio samo na izjašnjenju tog policijskog službenika. Da li je eventualno izvršen uvid u putne naloge ili tehničku knjigu vozila da se ustanovi da li je evidentirana vožnja u vremenskom periodu koji je naveden u pitanju Nezavisnog odbora, odnosno da li je upit prosljeđen unutrašnjoj kontroli koja bi trebala da provjeri navode Nezavisnog odbora. Obzirom da je policijski komesar rekao da je on dao odobrenje policijskom službeniku da koristi službeno vozilo u privatne

svrhe, postavila je pitanje policijskom komesaru da li se to dobrenje daje u pisanoj formi ili je to odobrenje dato usmenim putem.

Nadovezujući se na pitanja svojih predhodnika član Nezavisnog odbora konstatovao je da je i sa bivšim komesarom bila slična situacija. Naveo je da je na jednoj od sjednica Nezavisnog odbora slučaj korištenja službenog vozila u privatne svrhe skrenuta pažnja bivšem policijskom komesaru u smislu da se instruktivna depeša koju je on donio u praksi ne primjenjuje. Jedan od slučajeva kojem je bivšem komesaru skrenuta pažnja jeste za službenika I.N. na području Breze, gdje je također od strane tog policijskog službenika samo dato izjašnjenje da nije koristio službeno vozilo u privatne svrhe u Brezi. Kasnije je pokrenut disciplinski postupak protiv njega ali ne zbog tog slučaja već zato što je službenim vozilom otišao u neko lječilište/banju. Slično je postupano i u slučaju policijskog službenika A.M. gdje se službenim vozilom Uprave policije njegovo dijete dovozilo u policijsku školu na Vracama. Policijski komesar je istakao da se dešava da pojedini službenici koriste službeno vozilo u privatne svrhe npr. kada kolegi umre npr. otac ili majka i koristi se službeno vozilo da se ode na sahranu/dženazu. Naglasio je da je teško kontrolisati korištenje 300 službenih vozila. Odgovornost je na rukovodiocima organizacionih jedinica koji imaju i previše posla tako da se ne mogu u potpunosti baviti i tim. Naglasio je da se odobrenje daje usmenim putem. Vjerovatno i ima nekih zloupotreba ali u većini slučajeva se vozila koriste sa odobrenjem pretpostavljenih. Po njegovom mišljenju stanje je neuporedivo bolje nego što je to bilo ranije.

Članica Nezavisnog odbora, se osvrnula na odgovor koji je policijski komesar dostavio u vezi sa pitanjem postavljenim na prošloj sjednici a koji se odnosi na problematiku zapošljavanje policijskih službenika. Istakla je da se u dostavljenom odgovoru navode dva zaključka Skupštine Kantona Sarajevo zbog kojih se nije moglo vršiti zapošljavanje ali nije navedeno šta znače konkretno ti zaključci odnosno šta je decidno u njima rečeno. Istakla je da je uspjela u Službenim novinama Kantona Sarajevo pronaći drugi zaključak od 17.11.2020. godine u kojem je navedeno da se zaključak od 28.09.2020. godine ne odnosi na Upravu policije odnosno da se ista izuzima od primjene tog zaključka, te pretpostavlja da se to odnosi i na zabranu zapošljavanja. Obzirom da je zaključak stavljen van snage da li su pokrenute aktivnosti na izradi Pravilnika o unutrašnjoj organizaciji u smislu formiranja Komsije i sl. Također je postavila pitanje na šta se tačno odnosi konstatacija u odgovoru da postoji neusklađenost sa drugim zakonskim i podzakonskim propisima čiji predlagач su drugi kantonalni organi. Policijski komesar je odgovorio da je prvim zaključkom Skupštine KS (od 28.09.2020. godine) zabranjeno zapošljavanje u Kantonu Sarajevo ali i izmjena postojećih pravilnika o sistematizaciji. Prijem novih policijskih službenika se mora raditi po novom Pravilniku o unutrašnjoj organizaciji i isto bi iziskivalo trošenje većih novčanih sredstava. Istakao je da su urađene određene izmjene Zakona o državnoj službi i održan je sastanak sa ministricom pravde gdje bi se olakšalo zapošljavanje policijskih službenika ali sugestije za izmjene navedenog zakona nisu usvojene. Potrebno je što prije prilagoditi (izraditi novi) Pravilnik o sistematizaciji radnih mjesta. Članica Nezavisnog odbora je istakla da smatra da je previše vremena izgubljeno i da nije niti formirana Komisija koja bi eventualno radila na donošenju novog Pravilnika o sistematizaciji iako rok za donošenje istog još uvijek nije istekao. Ipak smatra da se navedeni podzakonski propis mogao i ranije donijeti jer se već znalo koje će biti izmjene Zakona o unutrašnjim poslovima i policijskim službenicima tako da se tekst Pravilnika mogao i prije pripremiti.

Članica Nezavisnog odbora, je postavila pitanje policijskom komesaru u vezi Presude Kantonalnog suda u Sarajevu po tužbi policijskog službenika "S.K." gdje je uložena apelacija Ustavnom sudu. Iz medija saznajemo da je Ustavni sud donio odluku da je apelacija preuranjena i odbijena je tražena mjera policijskih službenika. Policijski komesar je odgovorio da je prošli petak dobio od Pravobranilaštva akt kojim se traži njegovo izjašnjenje u vezi sa privremenim mjerama obezbjeđenja te da ima informaciju da je zakazano ročište 19.02.2021. godine na Općinskom sudu gdje bi se trebala donijeti odluka o ovom predmetu. Naglasio je da je od više relevantnih subjekata tražio pravnu pomoć za postupanje po presudi ali istu nije nikada dobio u pisanoj formi. Radi se o pravosnažnoj presudi i uopće nema dilemu da istu treba provesti.

Član Nezavisnog odbora je istakao da se tu treba voditi računa da se ne počini krivično djelo. Skrenuta je pažnja policijskom komesaru u vezi ovog predmeta da ne dođe u poziciji da snosi posljedice zbog neprovođenja sudske presude.

Član Nezavisnog odbora je istakao da je prvi dio presude nesporan odnosno jasan. Policijski komesar je rekao da je tek u petak zvanično dobio presudu da je apleacija preuranjena.

Član Nezavisnog odbora smatra da oni koji su zastupali ove policijske službenike su pogriješili jer su uložili reviziju a ona ne odgađa izvršenje presude, a ne mogu se obratiti Ustavnom sudu BiH. Njegovo je mišljenje da ni mjera neće uspjeti jer je u pitanju pravosnažna presuda. Sud je već poništio presudom činove a i Zakon o policijskim službenicima je sasvim jasan da se u tom slučaju policijski službenici vraćaju u niži čin.

Policijski komesar je obavijestio članove Nezavisnog odbora da je dobio zahtjev bivšeg komesara Halilovića kojim traži saglasnost da učestvuje na FACE televiziji a tema je predmet „Dženan Memić“.

Član Nezavisnog odbora je postavio pitanje komesaru da li je tačno da pored predmeta „S.K“ postoji još jedan predmet koji se vodi na sudu, odnosi se također na nezakonitosti koje su počinjene prilikom činovanja a riječ je o policijskom službeniku G.R. Policijski komesar je odgovorio da postoje tri predmeta.

Član Nezavisnog odbora, dodao je da je u predmetu „S.K “ na listu kandidata „vraćen“ policijski službenik koji je ranije odbijen jer nije ispunjavao određene uslove a niko ne zna na koji način se isti kasnije našao na listi i dobio čin. Policijski službenik H.D. nije uopće proveo potrebno vrijeme u ranijem činu na način kako je to zakonom propisano a poznato nam je da se isti pojavljuje u predmetu „Dženan Memić“ i sva ta ponašanja u navedenom predmetu su kasnije ocjenjena sa ocjenom odličan.

Član Nezavisnog odbora, postavio je pitanje policijskom komesaru u vezi sa otuđenim motornim vozilima, da li ima iznuda. Policijski komesar je odgovorio da su uglavnom u pitanju motorna vozila manje vrijednosti i nema iznuda. Obično se radi o rent-a caru ili lizingu.

Tokom sjednice su članovi Nezavisnog odbora postavljali pitanja komesaru kako bi mogli dobiti dovoljno elemenata za prijedlog godišnje ocjene rada policijskog komesara za 2020. godinu.

Članica Nezavisnog odbora je postavila pitanje policijskom komesaru da navede šta mu je to bilo najveći izazov u 2020. godini, šta bi mogao navesti kao nešto što je najbolje urađeno a čime baš i nije zadovoljan odnosno što je planirao a nije uspio da realizuje u 2020. godini. Policijski komesar je odgovorio da je sigurno najveći sigurnosni izazov migrantska kriza sa kojom se susrećemo gdje je u više navrata pokušavao da utiče na više nivoe vlasti da se poduzmu konkretni koraci, prisustvovao sastancima, slao dopise, predlagao ali sve se na kraju svede na političko pitanje odnosno politički problem. Istakao je da je bilo dva ili tri ozbiljna incidenta sa migrantima a veliki je pritisak i građana, osjećaju se nesigurno. Njegovo je mišljenje da je Uprava policije dala veliki doprinos u poboljšanju stanja i doržavanju reda i mira. Po njemu je stanje sigurnosti u Kantonu sarajevo poprilično zadovoljavajuće. Ponosan je na depešu iz oktobra 2020. godine (dobio je potvrdu i od kolega iz RS-a da se izvještavanje o počinjenim krivičnim djelima odnosno rasvjetljenosti radi na isti način kao i u FBiH) kojom je istrajao na načinu izvještavanja koje odgovara stvarnom stanju na terenu. Po prvi put se imaju istiniti uporedni podaci, ima sigurno i određenih slabosti u radu, nije sve idealno. Slabost je po njemu Odjel za borbu protiv narkomanije i u tom smislu želi da obavi određene premještaje u organizacionom smislu. U ostalim oblastima postoje također određeni nedostaci subjektivne i objektivne naravi. Najveći broj migranata je smješten na području Kantona Sarajevo. Prvo se moraju stvoriti pravne pretpostavke da bi se mogli boriti sa migrantskom krizom. Pokrenut je postupak – izrada elaborata gdje će se ići sa zahtjevom prema Ministarstvu finansija da se uzmu kreditna sredstva za body kamere da bi se policijski službenici opremili sa istima čime će se preventivno djelovati a i policijski službenici će se drugačije ponašati. Također, počele su aktivnosti sa projektom vezano za video nadzor te bi se sljedeće sedmice trebao održati sastanak sa predstavnicima BH telekoma te da se Vlada KS izjasni oko ovog projekta. U oblasti borbe protiv korupcije je po njemu puno urađeno. Policijski komesar

je istakao da se u vezi sa ubistvom dva policijska službenika intenzivno radi i da se očekuju određeni pomaci u tom smislu.

Član Nezavisnog odbora postavio je pitanje policijskom komesaru da li Uprava policije posjeduje operativne podatke o postojanju organizovanih kriminalnih grupa u Kantonu Sarajevo odnosno da li se prate savremeni tokovi u tom smislu. Policijski komesar je odgovorio da Uprava policije nije neinformisana, postoje podaci koji se razmjenjuju sa SIPA-om i FUP-om, asistiraju te su pripadnici Uprave policije uključeni aktivno onoliko koliko im se dozvoljava.

Član Nezavisnog odbora postavio je pitanje da li Uprava policije prikuplja sama te podatke. Policijski komesar je odgovorio da prikuplja i ima i konkretne predmete koji su pod posebnim istražnim radnjama.

Policijski komesar je istakao da mu je žao što nije uspio nabaviti zaštitnu opremu (npr. prsluci) jer se postupak javne nabavke vraća po ko zna koji put. Također, zadatke koje je bio postavio a nisu izvršeni u 2020. godini su svakako nedonošenje Pravilnika o sistematizaciji, činovanje policijskih službenika te konkurs za prijem novih službenika u Upravi policije.

Član Nezavisnog odbora postavio je pitanje policijskom komesaru vezano za penzionisanje policijskih službenika u smislu koliko policijskih službenika treba da ide u penziju. Sporno je pitanje načina na koji se vode evidencije u Upravi policije obzirom da se Nezavisni odbor u svom radu susretao sa različitim podacima o vremenu odlaska u penziju za određene policijske službenike, npr. bivši policijski komesar V.Ć. prilikom apliciranja za poziciju policijskog komesara dostavio potvrdu iz koje je vidljivo da isti ispunjava uslove za odlazak u penziju u aprilu 2018. godine. U toku jednog od postupaka pred Općinskim sudom, V.Ć. je priložio platnu listu iz koje je vidljivo da je isti u novembru 2017. godine imao 44 godine i 9 mjeseci radnog staža te je u tom smislu već u februaru 2017. godine ispunjavao uslove za odlazak u penziju. Policijski komesar je odgovorio da se u tom segmentu sada može pohvaliti obzirom da su se desile određene promjene u Sektoru za pravne i kadrovske poslove koji se bavi radno-pravnim statusom i po prvi put je izvršena digitalizacija i omogućeno je da se jednim klikom dobiju svi podaci za svakog policijskog službenika. Svi su personalni dosijei skenirani a ono što je primjećeno jeste da nedostaje mnogo dokumentacije. Bit će određena jedna osoba koja će biti odgovorna za vođenje tih dosijea, imat će ulaznu šifru te će svaki ulazak u bilo koji dosije biti evidentiran. Ove godine u penziju odlaze V.Ć. i još tri glavna inspektora i tri samostalna inspektora. U međuvremenu je (kako je već svima poznato) došlo do izmjene Zakona na način da se u obzir uzima staž osiguranja a ne penzioni staž. Jedini zvanični dokument o ispunjavanju uslova za odlazak u penziju je povrda iz PIO. Što se tiče 1996. godine Uprava policije je uzima kao godinu u kojoj su plaćeni doprinosi.

Na sjednici su članovi Nezavisnog odbora pristupili pojedinačnom obrazlaganju mišljenja o radu policijskog komesara za 2020. godinu.

Nakon pojedinačnih obrazloženja rada policijskog komesara za 2020. godinu od strane svakog člana Nezavisnog odbora (koje je navedeno u Zapisniku o glasanju) pristupilo se glasanju o prijedlogu ocjene rada policijskog komesara za 2020. godinu.

Četiri (4) člana Nezavisnog odbora su glasali za ocjenu zadovoljava dok su tri (3) člana Nezavisnog odbora glasala za ocjenu nezadovoljava.

Obzirom da nakon prvog kruga glasanja nije postignuta većina za prijedlog pismene ocjene rada policijskog komesara za 2020. godinu na način kako je to predviđeno Zakonom o unutrašnjim poslovima Kantona Sarajevo (5 glasova za ocjenu zadovoljava ili nezadovoljava), u skladu sa Poslovníkom o radu Nezavisnog odbora pristupilo se ponovnom glasanju. Nakon ponovnog glasanja članovi Nezavisnog odbora su ponovili svoje glasanje kao i prvi put te je predsjednik Nezavisnog odbora konstatovao da nije donesena odluka o prijedlogu pismene ocijene rada policijskog komesara za 2020. godinu obzirom da nije osiguran dovoljan broj glasova niti za ocjenu zadovoljava niti za nezadovoljava (5 glasova) te će policijski komesar za 2020. godinu ostati neocjenjen.

Nezavisni odbor je sačinio saopštenje za javnost te je dogovoreno da se ministar unutrašnjih poslova Kantona Sarajevo obavijesti o naprijed navedenom.

U februaru 2021. godine predstavnici Nezavisnog odbora su prisustvovali sjednici Komisije za sigurnost Skupštine Kantona Sarajevo radi prezentovanja Izvještaja o radu policijskog komesara

Uprave policije Ministarstva unutrašnjih poslova Kantona Sarajevo za vremenski period oktobar – decembar 2020. godine.

IV-Izjašnjenje pripremljeno za vođenje sudskog postupka, ishodi pokrenutih sudskih postupaka, ishodi institucija po podnešenim prijavama protiv članova Nezavisnog odbora podnošenje prijava od strane Nezavisnog odbora

Na zahtjev Pravobranilaštva Kantona Sarajevo, Nezavisni odbor je pripremio izjašnjenje i dostavio dokaze koji su im potrebni u parničnom postupku radi pripreme odgovora na ponovnu mjeru osiguranja koju je zbog navodnih promijenjenih okolnosti podnio Mevludin Halilović protiv Rješenja Vlade Kantona Sarajevo od 29.03.2019. godine broj 02 05-8805-27/19 kojim je tužitelj smijenjen sa dužnosti policijskog komesara Uprave policije Ministarstva unutrašnjih poslova.

Rješenjem Općinskog suda u Sarajevu broj: 65 0 Rs 758224 21 Mo 2 od 04.01.2021.god. odbijen je prijedlog za donošenje sudske mjere osiguranja

Presudom Općinskog suda u Sarajevu broj: 65 0 Rs 758224 19 Rs od 04.01.2021. god. je u cjelosti odbijen tužbeni zahtjev tužitelja Halilović Mevludina kojim je traženo da se utvrdi da je nezakonita Odluka Vlade Kantona Sarajevo broj:02-05-05-4910-28/19 od 28.02.2019. godine o utvrđivanju ocjene rada policijskog komesara za 2018.godinu, Odluke kojom je odbijen prigovor policijskog komesara broj:02-05-8805-27/19 od 14.03.2019. godine, te Rješenja tuženog broj: 02-05-13232-12/19 od 29.03.2019. godine kojim je tužitelj smijenjen s dužnosti policijskog komesara u Ministarstvu unutrašnjih poslova KS .

Na presudu je od strane tužitelja uložena žalba.

12.01.2021. godine od strane Komisije za odlučivanje o sukobu interesa Parlamentarne Skupštine BiH, donesen je zaključak kojim je odbijena prijava zbog nenadležnosti.

U izvještajnom periodu Nezavisni odbor je prosljedio na eventualno daljnje postupanje presudu Općinskog suda u Sarajevu broj: 65 0 Rs 361381 19 Rsž 5 od 02.11.2020. godine Kantonalnom tužilaštvu Kantona Sarajevo, kao i zaprimljenu anonimnu prijavu koja se odnosi na način sticanja činova policijskog komesara Nusreta Selimovića.

IV- Ocjena stanja i postignutih rezultata

Tokom izvještajnog perioda Nezavisni odbor je u cjelosti realizirao planirane programske aktivnosti.

Nezavisni odbor je djelovao isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrirane organizacije ili udruženja ili bilo kojeg naroda ili pojedinca.

Nezavisni odbor je o svom radu redovno obavještavao javnost, putem web-portala i sredstava javnog informisanja, te je u cijelosti ispoštovan princip javnosti.

V- Kadrovska i materijalna osposobljenost

U periodu od septembra 2020. godine – februara 2021. godine, Nezavisni odbor je obavljao poslove i zadatke iz nadležnosti Nezavisnog odbora u punom sazivu.

Sjednice Nezavisnog odbora održavane su u obezbjeđenoj sali Skupštine Kantona Sarajevo.

Napominjemo da su u izvještajnom periodu sve sjednice Nezavisnog odbora održane u sali uz poštivanje preporučenih bezbjednosnih mjera, te da je Nezavisni odbor uspio i pored svih teškoća održavati redovne mjesečne sjednice.

Administrativno-tehničke poslove Nezavisnog odbora obavljao je sekretar, koji je uposlenik Stručne službe za skupštinske poslove, a isti je zadužen za čuvanje kompletne arhive Nezavisnog odbora.

VI - Programska orijentacija za naredni period

U narednom vremenskom periodu Nezavisni odbor će kontinuirano obavljati poslove utvrđene Zakonom o unutrašnjim poslovima Kantona Sarajevo, Zakonom o policijskim službenicima i Poslovníkom o radu Nezavisnog odbora, te ostalim pozitivnim propisima sa osnovnim ciljem postizanja još većeg stepena demokratizacije u radu policije, zaštite ljudskih prava i sloboda građana koji žive ili borave na području Kantona Sarajevo, te postizanja što većeg nivoa sigurnosti građana Kantona Sarajevo.

Nezavisni odbor predlaže Skupštini Kantona Sarajevo da usvoji Izvještaj o radu Nezavisnog odbora za period septembar 2020. godine – februar 2021. godine.

Predsjednik Nezavisnog odbora

Miroslav Kružik, s.r.